

四庫全書

經部

欽定四庫全書

經部

春秋地名考畧卷一

一至三

詳校官監察御史臣劉涓

給事中臣溫常綬覆勘

總校官庶吉士臣倉聖脉

校對官助教臣羅萬選

謄錄貢生臣周培

欽定四庫全書

經部五

春秋地名攷畧

春秋類

提要

臣等謹案春秋地名攷畧十四卷

國朝高士奇撰康熙乙丑士奇以詹事府少詹  
事奉

勅撰春秋講義因考訂地理併成是書奏

進據閻若璩潜邱劄記稱秀水徐勝敬可為人作

左傳地名訛問余成公二年寧之戰云云則實士竒倩勝代作也其書以春秋經傳地名分國編次皆先列國都次及諸邑每地名之下皆先列經文傳文及杜預註而復博引諸書考究其異同砭正其疎舛頗多精核惟時有貪多炫博轉致瑣屑者如魯莊公築臺臨黨氏遂立黨氏臺一條殊于地理無闕又如晉以先茅之縣賞胥臣遂立先茅之縣一條

不能指為何地但稱猶云蘇忿生之田則亦  
安貴於考耶是亦過求詳備之失也乾隆四  
十三年三月恭校上

總纂官臣紀昀臣陸錫熊臣孫士毅

總校官臣陸費墀

--	--	--	--	--	--	--	--	--

春秋地名攷畧原序

錢塘高宮詹作春秋地名攷畧十四卷既成而示余屬  
為之序予受而讀之喜其蒐採之博考辨之精反覆不  
忍釋手既而潛玩再三乃知其用心之勤則在乎貫通  
全經非獨侈張見聞已也蓋左氏之學莫贖於地名得  
其解者惟杜元凱氏在前雖有應仲遠賈景伯諸家不  
之及也元凱既作經傳集解又為長歷以正閏朔為世  
族譜以紀統繫為釋例土地名以求會盟征伐之迹亦

綦備矣惜其書不盡傳鄭夾漈有言杜預解左氏顏師古解漢書為左班功臣顏氏所通者在訓詁杜氏所通者在星厯地理顏氏治訓詁如與古人對談杜氏治星厯地理如羲和之步天禹之行水誠哉言也乃今所傳集解之書謹嚴特甚徃徃稍引其端以待學者之自悟其疑者寧缺而不詳今之去古視杜氏又遠矣說地理者有司馬彪闕駟京相璠宋忠司馬貞杜佑賈耽李吉甫輩言人人殊安所取正乎予嘗謂求通於後世之史



志不若讀經疏讀經疏又不若潛玩經傳之本文誠能貫通全經而求其理當必有迎刃而解者即如齊晉戰鞏公羊以為去齊五百里似乎齊之邊邑矣讀本傳三周華不注之文而後知其在歷下也楚山有大別鄭氏以為在安豐矣讀左司馬之言曰沿漢而與之上下而後知其在漢口也古言呂梁未鑿河出孟門之上孟門在晉之西矣乃齊靈公之伐晉也自朝歌入孟門用是知晉東亦有孟門為太行之陁道也晉有二瑕一在河

外而解者混之及觀西師之侵在河曲宵遁之後詹嘉  
之守在桃林築塞之時而後知河外之瑕必不可混於  
河北也斯非其淺而易見者耶嘗欲用此意勒成一書  
卒卒未暇官詹乃先得我心亦足快矣噫嘻左傳一書  
固萬世經術之祖也學古而不通于春秋譬若溯河而  
不探其源尋枝而不揣其本必不得之數也試畧言之  
吳闞邗溝以通餽道此枋頭堰淇之嚆矢也闔閭之伐  
徐也防山而水之此智伯決晉之濫觴也孫叔敖治芍

陂以溉雩婁其孫掩為令尹復脩其術此秦陘翟陂以下言田農水利者所由昉也至于齊塹防門始于平陰楚營方城亘于宛葉其後燕之汾門魏之濱洛秦之起造陽而抵臨洮皆權輿于此矣若夫虎牢之為成臯也穆陵之為大峴也鍾吾之為宿豫也州來之為壽陽也沈之為懸瓠也申之為宛也甯之為修武也鍾離之為濠口也大隧直轅冥阮之為義陽三關也渚宮之為江陵也夏汭之為武昌也澶淵之為三城也笠澤之為五

湖也皆七國漢楚吳魏六朝高齊宇文唐宋之君所為  
百戰而爭者也而皆見端于春秋是故欲識天下之大  
勢不可以不知春秋欲讀後世之史不可以不知春秋  
此書匪直元凱功臣抑且為禹貢職方之嫡系體國大  
業粲然具矣

今天子覃精聖學博極古今緝熙勿倦特命宮詹總裁  
春秋講義以左氏為綱領余兄弟隨澤州桐城諸先生  
後又與宮詹同拜

命修一統志發凡起例將于是書考正而宮詹且進之  
黼筵上備

乙夜之覽度必有當于

睿懷之萬一者謹泚筆而序之康熙二十有六年冬十  
月崑山徐乾學謹序

九丘之書逸矣伯禹伯益之所名夔暨之所志周公之  
所錄其著在六經者莫若禹貢詩春秋言禹貢者則有  
若摯虞之畿服經孟先之圖程大昌之論易祓之廣紀

言詩者則有若范處義王應麟之地理考言春秋者則有若京相璠之土地名楊湜鄭樵之譜張洽之表外如嚴彭祖之圖專紀盟會則圍伐滅取土地之見遺者多矣羅泌專紀國名則郡縣之失載者又多矣然則說春秋者必兼包乎郡國土地之目而後可無憾焉試迹其地名有見於經者有見於傳者有互見於經傳者顧其文蔑以為昧紀以為杞滑以為郎裡以為打偃以為纓崇以為柳鐵以為粟以陸渾為貴渾以厥慙為屈銀以

臯鼬為浩油以侵祥為侵羊若是者不可悉數也邾也  
謂之邾婁貫也謂之貫澤訾婁也謂之叢安甫也謂之  
寧沙也謂之沙澤一邾也或以為成或以為盛一邾也  
或以為犁或以為麗一孟也或以為霍或以為雩一號  
也或以為郭或以為廓一艾也或以為鄆或以為蒿狸  
脈謂之狸軫或又曰蜃也蚡泉謂之漬泉或又曰貴也  
鄆丘謂之犀丘或又曰菑丘又曰師丘也其在當時傳  
者已滋異同繁省之不一而况乎百世之下壤地之離

合名號之廢置升降乃欲通習而考證之刊落叢謬不  
其難哉今

天子命儒臣編纂春秋講義於是錢塘高學士充總裁  
官既編成經

進矣又廣采方志以餘力輯春秋地名攷十四卷

彝尊

受而讀之愛其考迹疆理多所釐正簡矣而能周博矣  
而有要無異聚米畫地振衣而挈其領也原春秋之作  
孔子既取百二十國實書筆削之又別述職方述職方



者所以輔春秋之不及爾故夫學乎春秋非惟義疏序  
例大夫之辭公子之譜皆宜究圖而土地之名尤其要  
焉者有講義以正諸家之躋駁不可無地名考以補方  
志之疏舛若經之有緯書之有正必有攝也藝尊嘗與  
學士同直

南書房既而以遣謫官今老矣於經義無所發明序學  
士之書幸託姓名傳諸後世竊比于北宮司馬諸子獲  
附見於春秋之傳焉秀水朱彝尊序

禹會諸侯于塗山執玉帛者萬國及周千八百國春秋以還互相吞噬強兼弱削疆域難稽其見于經傳者總一百二十四國稅安禮指掌圖可攷也乃若會盟侵伐蒐狩臺囿城築諸地與夫述古稱先國邑之名往往襍出于其間元凱所注十得八九其有闕而失據者則京相璠之春秋土地名三卷鄭樵春秋地名譜十卷楊湜春秋地譜十二卷以及酈善長注水經陸淳春秋纂例張洽春秋集傳多所考按補元凱所未備然其間世代

侵尋沿革互異未有別類分門犁為一書暢然而無憾者夫漢陽諸姬盡于楚河南小侯半蝕于晉在春秋時故版舊索已茫不可問况經嬴秦之郡縣六朝之割據地非吾土而僑寓其名境已絲棼而兩侈其號朝南暮北瓜剖豆分立乎今日以指隱桓隱桓之日遠矣爽鳩季荊之墟有窮相土之里夫孰得而是正歟春秋傳心之史所重者明王道正人心誅亂臣討賊子是是非非以一字為褒貶其義例至精其意指極微至于地名之

同異往往毫釐千里讀其書如冠帶之國不知其都邑  
何在王地洛邑相近而殊名故絳新田屢遷而非昔楚  
丘之紛紛聚訟郊郢之譌為郢中歷代之沿革變遷所  
繫非細豈可以聖人之大經漫曰不求甚解耶乙丑夏

四月臣奉

命總裁春秋講義因于纂紀之暇博按諸書而參攷之  
取春秋二十會盟之國為綱各以其當時封境所屬隨  
地標名詳其原起條其興革諸小國則編年附綴之其

類削入他國者則從其初不從其後其有沿譌承誤者必折衷以歸于一是一展卷而知當日之某地某名即今日之某名某處發懷古之幽情敬備

聖明之顧問若曰羽翼經傳則臣何敢焉康熙二十七年歲在戊辰仲冬

日講官起居注詹事府詹事兼翰林院侍講學士臣高士奇拜手謹序

三ノ下ノ三

原序

凡例

一列邦境壤相叅分國類聚則易于解悟首周尊王也次魯宗國也甥舅之國齊為首懿親之封晉衛鄭為大又次之三恪之大者宗也地居中國之要樞惟陳蔡又次之秦以西垂之長吳越徐巴與楚俱僭王皆春秋所謹者又次之他如邢曹虞虢邾莒杞紀許滕薛小邾北燕其分地亦時紀于春秋雖小國僻遠亦以類附之昔國語次周以下魯齊

晉鄭楚吳越共八國史記列吳齊魯燕管蔡陳杞  
衛宋晉楚越十三世家茲非有意為進退特因其  
事之繁簡期有助于窮經而已餘諸小國隨見經  
之先後編年次之于後

一王都及各國之都必列于首曰都于某地遷國又  
列一條曰遷于某地其都但據春秋時現在如周  
之王城成周晉之絳新田是也至如春秋以前始  
封建都之地有見于經傳者如周之駘豳岐豐晉



之唐曲沃亦相次以揭於前而殊其標目以別之  
有不見于經傳者如齊之營丘鄭之咸林杞之雍  
丘則冠於小註中而已其遷徙在春秋後如楚之  
郢陳壽春衛之野王則附于小註之尾而後以所  
屬之地捱年綴附庶乎振裘得領披覽之餘曉然  
于當日之形勢凡為朝聘會盟往來之道里征伐  
圍入攻守之機宜恍若身親其事者亦讀經之大  
快矣

一諸地名有屢見于經者必摘其樞要序次感章凡有三意或一地而先為國後為邑先屬此國後屬彼國通其條貫則本末秩然一也或一地而註疏家所指互異詳玩本文參伍折中則真解自出二也或兩地三地同名如周秦各有王城齊宋各有葵丘晉齊魯各有東陽魯有兩防兩鄆鄭有兩汜楚有兩城父又或一地而有兩名如黃父即黑壤廩延即酸棗析即白羽之類彙萃相從彼此互晰

則同者不至誤以為異異者不至誤以為同矣三也若夫沿革之變務具始終前後且必詳之况本經之內乎

一元凱春秋夙稱武庫註釋之精古今無兩然猶曰諸地名有疑者曰有以示不審闕者不復記見于隱六年之註或地形稍遠者則曰迂迴疑蓋其慎也茲篇每一地名之下先錄本文次詳杜註然後以先儒註疏及各史志傳參考之顧採取之間亦

不敢易史家最善莫如班氏矣乃以衛都楚丘為  
成武楚都丹陽為漢之丹陽舛謫特甚至若劉昭  
之誤引魏叔之冗筆益難讀矣水經注採取極博  
乃如定之方中篇有景山毛傳訓景曰大而以為  
山名左傳向戌語驪蔑曰賈大夫之貌惡杜註賈  
國之大夫也而以為賈辛是則兔園誦習且不免  
于鹵莽也羅泌好用隱僻獨于抉擿經傳亦有所  
長取其純畧其疵繆者辨之不厭詳縷期歸於一

是焉

皇太子御成婚

凡例

--	--	--	--	--	--	--	--	--

欽定四庫全書

春秋地名攷畧卷一

詹事府詹事高士奇撰

周

都洛邑王城

武王作邑于鎬京謂之宗周是為西都既革殷命謂周公曰我南望三塗北望

嶽鄙顧瞻有河粵瞻維伊母遠天室營周居于維邑而後去蓋營之而未就也周公攝政之七年成王在豐欲宅洛邑使召公先相宅召誥曰太保朝至于洛十宅厥既得卜則經營越三日庚戌太保乃以庶殷攻位于洛汭越五日甲寅位成孔安國傳曰以衆殷之民治都邑之位于洛水北今河南

城也康誥曰周公初基作新大邑于東國洛四方  
民大和會史記曰成王使召公復營洛邑如武王  
之意周公復卜申視卒營築居九鼎焉曰此天下  
之中四方入貢道里均即此周書作雒解周公立  
城方千六百二十丈郭方七十二里南繫乎洛水  
北因乎邾山以為天下大湊平王東遷始居之以  
其在豐鎬之東謂之東都鄭氏詩譜曰周東都畿  
內方六百里其封域在禹貢豫州太華外方之間  
北得河陽漸冀州之南是也平王四十九年入春  
秋桓九年書紀季姜歸于京師公羊傳曰京師者  
天子之居也京者何大也師者何衆也天子之居  
必以衆大稱之自此屢書至昭二十二年叔鞅如  
京師皆指此亦謂之王城莊二十一年諸侯同伐  
王城殺王子頽僖十一年揚拒泉臯伊雒之戎入  
王城二十五年襄王入于王城昭二十二年劉子  
單子以王猛入于王城二十三年王子朝入于王



城是也平王居東都後十一世至景王而王室亂庶長子朝與子猛爭立猛卒弟敬王丐立出居成周而子朝居王城周人謂子朝曰西王敬王曰東王以成周在王城之東故也其後子朝奔楚敬王遂居成周王城廢至赧王復居王城秦人遷之置三川郡漢為河南縣屬河南郡後漢晉屬河南尹晉地道記河南城去洛城四十里建武二年遣馮異定闢輔車駕送至河南晉永嘉五年劉聰遣呼延晏等寇洛陽比至河南晉兵十二敗遂至洛陽隋大業元年擴其東偏十八里營為新都前直伊關之口後依邙山之塞東出瀍水之東西踰澗水之西洛水貫其中以象天漢橫橋跨洛水曰天津橋移洛陽縣並置城中為附郭唐亦曰東都外城周五十二里九十步光宅元年曰神都神龍元年復曰東都武后號太初宮高宗嘗居以聽政宗曰西京河南府金廢京而府如故省河南縣入洛陽

元曰河南路明曰河南府治洛陽縣今仍之城即  
隋所營也其城內西偏即王城故址也再按邲  
邲即邲山也桓二年臧哀伯曰武王克商遷九鼎  
于雒邑杜注時但營雒邑未有都城至周公乃卒  
營雒邑謂之王城宣三年王孫滿勞楚子曰成王  
定鼎于邲鄆杜注邲鄆今河南也武王遷之成王  
定之昭二十六年王子朝告諸侯曰攜王奸命諸  
侯替之而建王嗣周遷邲鄆杜注攜王伯服王嗣  
平王也後漢志東城門名鼎路門九鼎所從入也  
服虔云河南有鼎中觀云置九鼎者蓋邲鄆即王  
城之別名矣亦謂之邲桓七年遷盟向之民于邲  
杜注邲王城也襄二十四年齊人城邲于是穀洛  
闕將毀王宮齊故為王城之國語晉文公既定襄  
王于邲是也今河南南府西有邲鄆陌亦謂之邲山  
圖經云邲山在郡西南迤  
運至城北二里亦曰印山

遷於成周

周公使召公卜營王城并卜營成周以處殷之頑民蓋二役一時並成也洛誥周公

曰予惟乙卯朝至于洛師我卜河朔黎水我乃卜澗水東澠水西惟洛食我又卜澠水東亦惟洛食孔安國傳曰我使人卜河北黎水上不吉又卜澗澠之間南近洛吉今河南城也澠水東今洛陽也將定下都遷殷頑民故并卜之卜必先墨畫龜然後灼之兆順食墨韋昭曰成周在澠水東王城在澠水西是也周初成周為二公分陝之地康王十二年王至于豐以成周之衆命畢公保釐東郊春秋亦曰成周隱三年鄭祭足取成周之禾宣七年成周宣榭火杜注成周洛陽宣榭講武屋別在洛陽者昭二十六年天王入于成周王子朝奔楚于是諸侯戍周三十二年經書城成周傳云王使富辛與石張如晉請城成周曰昔成王合諸侯城成周以為東都崇文德焉今我欲徼福假靈于成王

修成周之城。俾戍人無勤。杜注：子朝之亂，其餘黨多在王城。敬王畏之，徙都成周。成周狹小，故請城之。蓋自是王定計居成周矣。于是范獻子謂魏獻子曰：與其戍周不如城之。冬十月，合諸侯之大夫于狄泉，尋盟。且令城成周。己丑，士彌牟營城。周計丈數，揣高卑，以效于劉子。定元年，孟懿子會城成周。庚寅，裁宋仲幾，不受功。士彌牟執之，歸于京師。三旬而畢，乃歸諸侯之戍。此京師即成周也。自是至于春秋終，凡言京師皆此矣。定六年，天王處于姑蘧，避僭。翩之亂，七年，王入于王城。此王城似即成周。蓋敬王既定都後，周人即謂之王城也。帝王世紀：城東西六里，十步，南北九里，十步，俗稱九六城。秦因周城而大之，置宮闕于洛陽。輿地志：秦三川守治洛陽，漢亦為河南郡治。後漢都此，規制益以宏壯。城十二門，南宮至北宮，相去七里。華延儁洛陽記曰：洛陽城內宮殿臺觀府藏寺舍凡百一

萬一千二百一十九間雄據形勢張衡賦曰汴洛  
背河左伊右瀍西阻九阿東門于旋盟津達其後  
大谷通其前迴行道于伊闕邪徑捷于輶轅是也  
曹丕篡位初居北宮晉武營雒大抵因之又築金  
墉城于城內西北隅縣初名洛陽自東漢改洛為  
雒魏仍舊魚豢曰漢火德火忌水故去水而加佳  
魏于行為土土水之牡也故除佳而加水晉仍為  
洛陽永嘉以後城郭宮殿大都蕪沒後魏孝文太  
和十七年南巡為之流涕景明二年廣陽王嘉請  
築洛陽三百二十三坊從之三年修營甫成後元  
顥入洛侯景燒金墉高歡宇文泰苦戰邙山城市  
又廢隋營新都并洛陽縣遷入都城其地遂虛今  
故城在府東二十里有銅駝街在宮南旁有汶陽  
里再按僖二十九年盟于狄泉杜注翟泉城內  
太倉西南池水也昭二十三年天王居于狄泉史  
記敬王元年晉人入敬王子朝自立敬王不得入

居澤蓋即此事賈逵曰澤邑名即狄泉也二十六年王始入于成周蓋此時狄泉與成周猶為兩地至城成周後始合為一矣後漢書昭公三十二年合諸侯于狄泉以其地大成周之城皇甫謐曰敬王徙居成周其地小不受王都故壞翟泉以廣之鄭氏曰狄泉本在下都城北時城成周乃繞狄泉于城內皆是說也晉志永嘉元年有蒼鶩起步廣里地陷庾信哀江南賦出狄泉之蒼鳥即此韋昭曰翟泉周墓所在帝王世紀云景王葬于狄泉今東陽門內有大街北有太倉中有景王陵西南望步廣里北眺翟泉二處相距遠近惟均戴延之西征記太子宮中有翟泉今乾無水再按杜氏曰敬王居成周後考王封其弟揭于河南以續周公之官職是為河南桓公威烈王時桓公孫惠公又封少子班于鞏以奉王于洛陽是為東周惠公蓋父子同諡也顯王二年韓魏即其所封分周為二

于是東西周同于列國顯王特寄居于東周而已  
赧王又遷西周而周乃亡蓋東西周之名前後凡  
三變初言東西周者以鎬京對洛邑而言中間言  
東西周者以王城對成周而言最後言東西周則  
以河南對  
鞏而言也

### 始封於駘

史記周之先后稷封于邠詩毛萇傳邠姜  
嬭之國堯見天因邠而生后稷故國后稷

于邠昭九年襄王曰我自夏以后稷魏駘芮岐畢  
吾西土也杜注駘在始平武功縣所治釐城徐廣  
曰今釐鄉在扶風蓋駘與邠之字同釐與駘之字  
同也秦孝公置釐縣漢初曹參攻釐是也後亦曰  
釐縣屬右扶風後漢省入郿縣故志曰郿有釐亭  
武功亦漢縣後漢廢永元八年復置武功縣志云  
武功舊治渭川南郿縣境後漢移治古釐城蓋西  
漢武功釐縣兩置至是始并為一釐初并郿後復

置則曰武功史所不載也晉屬始平郡後魏并入美陽縣太和十一年置武功郡于廢縣地後周天和初築武功城以置軍士建德初省郡尋改置武功縣遷于今武功縣治唐置稷州治此亦以后稷命名也旋廢今縣屬乾州古

聚城

在縣西南二十二里

邑於幽

毛萇詩傳曰公劉居于邠遭夏人亂迫逐公劉公劉乃避中國之難遂平西戎而遷其邑

于幽蓋諸侯之從十有八國焉國語祭公謀父曰昔我先世后稷以服事虞夏及夏之衰也棄稷勿務我先王不窋用失其官而自竄于戎翟之間韋昭注曰夏衰謂啟子太康也廢稷之官不復務農不窋及夏而遷于邠西接戎北近狄史記曰不窋卒子鞠立鞠卒子公劉立公劉雖在戎狄之間復修后稷之業公劉卒子慶節立國于幽諸文小異蓋幽邑經營數世而後成也左傳襄二十九年吳



公子札來聘為之歌幽杜注幽周之舊國在新平漆縣東北徐廣曰新平漆縣之東北有幽亭是也鄭氏詩譜云幽今屬右扶風枸邑漢志枸邑有幽鄉後漢志同朱子詩注亦用之漢漆縣今在邠州西漢枸邑縣今在三水縣東北二十五里三水縣在邠州東七十里漆縣枸邑漢皆屬右扶風晉皆屬新平郡本接壤也公劉之詩言遷幽之事詳矣曰于京斯依毛氏曰京大衆所宜居之地也詩又曰既溥既長既景迺岡毛氏曰公劉之居幽也既廣其地之東西復長其南北詩又曰夾其皇澗迺其過澗止旅乃密芮鞠之即毛氏曰皇過皆澗名鄭氏曰水之內曰芮水之外曰鞠漢志芮水出汧縣韓詩芮鞠作芮阨蓋綿地甚遠矣詩譜曰幽之封域在禹貢雍州岐山之北原隰之野今邠州東北有幽亭東五十里有幽谷三水縣西二十里有古幽城皆是也文翔鳳幽谷考曰幽為九谷之總名不啻自竄戎翟之間為慶陽寧州公劉

城在邠州西似所謂京高丘也未入幽  
谷之隩公劉冢則在邠州三水之間

又遷岐號曰周

詩綿之篇曰民之初生自土沮漆又  
曰古公亶父來朝走馬率西水滸至

于岐下毛傳公劉遷於幽至沮漆之地古公幽公  
也古公居豳狄人侵之去豳踰梁山邑于岐山之  
下天作篇云天作高山太王荒之毛傳荒大也鄭  
箋高山岐山也太王自豳徙焉則能尊大之此太  
王遷岐之說也左傳昭四年椒舉曰成有岐陽之  
蒐杜注成王歸自奄大蒐于岐山之陽岐山在扶  
風美陽西北昭九年魏駘蒞岐畢注亦同前漢志  
美陽縣岐山在西北中水鄉太王所居也此杜所  
本矣漢美陽縣在今武功縣境今岐山縣正在武  
功之西北彼時未有縣故岐山在其境內也後周  
置岐山縣于今長武境歷隋唐四遷而後定于今  
治乃始有岐山縣矣今岐山在縣東北十里山有

兩岐故名禹貢導岍及岐又荆岐既旅國語周之  
興也鸞鸞鳴于岐山呂氏春秋岐山九山之一也  
河圖岐山在崑崙東南為地乳地志岐山亦名天  
柱山其峰高峻若柱然唐六典關內名山曰岐山  
俗名鳳凰堆山之南有周原詩曰周原膺膺董荼  
如飴鄭箋廣平曰原地在岐山之南膺膺然肥美  
其所生菜雖性苦者亦甘如飴也周之國號蓋因  
乎此皇甫謐曰邑于周地故改國號曰周是也原  
又東北則太王之都在焉所謂岐陽也閔宮篇曰  
后稷之孫實惟太王居岐之陽實始翦商是也鄭  
氏曰文王始謀遷居定天下亦即在此皇矣篇曰  
度其鮮原居岐之陽在渭之將萬邦之方下民之  
王是也其後成王為岐陽之蒐宣王亦大獵岐陽  
蓋亦因省視宗國遂會衆以講武耳東漢建初七  
年幸岐山西魏大統十三年宇文泰從魏主狩岐  
陽唐貞觀七年于其地置岐陽縣十六年校獵于

岐陽二十二年縣廢永徽五年復置元和二年又廢宋為岐陽鎮今在縣東北五十里周原東西橫亘肥美寬平在縣東北四十里再按括地志云美陽城亦曰太王城亦曰周城寰宇記云周城一名美陽皆誤也後漢周城在美陽西北水經注岐水逕周城南歷周原其北則中水鄉成周聚又東合姜水逕美陽之中亭川又東逕美陽故城注雍入渭據此則周城美陽畫然二地矣周城即指岐陽今岐陽鎮在岐山縣之東境與武功之美陽相去甚遠中間尚隔扶風一縣漢時美陽之境甚廣扶風正為美陽地故岐亦得在其西北耳安得混為一地乎杜佑通典云美陽治中水鄉城西即中亭川尤繆蓋中水鄉與周城本相近故班固即以美陽為太王邑理可通矣隋志魏有周城縣後周廢今不知其處與此無涉王禕周公廟記曰周城今為岐陽鎮遺址猶存廣袤七八里四圍皆深溝南有

周原然則周城周原固確有其地無容混指矣  
再按隱六年周桓公言于王杜注周采地扶風雍  
縣東北有周城按此周城與前又別蓋周公初封  
之邑也鄭氏詩譜曰周公封魯死諡曰文公召公  
封燕死諡曰康公元子世之其次子亦世守采邑  
在王官春秋時周公召公是也即其說矣孔穎達  
曰春秋周召二公別于東都受采考王封弟揭于  
河南以續周公之官職蓋亦即受其采地今則不  
可考杜預但據始封言之耳魏收志雍縣有故周  
城括地志周公城在岐山縣北九里今岐山縣有  
周公邨周公廟知此周城亦在其境也雍縣即今  
鳳翔府治今岐山縣在府東五十里其東境漢屬  
美陽其縣城及縣之西境漢屬  
雍縣雍縣漢屬扶風郡晉仍之

作都于鄠

道鑑前編殷紂十九祀西伯伐崇作豐邑  
徙都之詩曰既伐于崇作邑于豐是也或

謂殷為崇侯虎國丈王伐之以作邑詩又曰豐水東注維禹之績四方攸同皇王惟辟鄭氏云堯時豐水汎濫為害禹治之使入渭文王武王作邑于其旁豐邑在豐水之東鎬京在豐水之西豐鎬相去蓋二十五里昭四年椒舉曰康有豐宮之朝杜注豐在始平鄠縣東有靈臺康王于是朝諸侯張揖曰灋水源自鄠南山豐谷東北流經長安城西又北至咸陽縣境入渭禹貢灋水攸同老子灋水出深十丈而不受塵垢即此也括地志鄠縣東三十五里有豐宮蓋近豐水之源也武王既克紂來自商則至于豐成王將宅洛邑則至于豐成王黜殷命滅淮夷則還歸在豐康王命畢公則至于豐孔穎達曰文王居豐武王未遷之時于豐立丈王之廟遷都而廟不毀故大事必以告也傳所云豐宮之朝亦此類矣今鄠縣南五里有豐城詩曰考卜惟王宅是鎬京此武王營鎬之事國語內史過

曰周之衰杜伯射王于鄆韋昭注鄆鎬京也水經注渭水與豐水會于短陰山水上舊有便門橋又東北與鎬水合水上承鎬池于昆明池北周武王之所都也自漢武帝穿昆明池基構淪褫無復可考鄆水又北流與漉池合詩所謂漉池北流浸彼稻田也又北逕靈臺西又逕阿房宮前合于渭唐十道志鎬池在長安城西昆明池北即周故都秦始皇時鎬京故址毀唐貞觀中并鎬池入昆明池今昆明池又涸為民田而鎬京故址益不可問程大昌曰昆明鑿而鎬都為池隋苑立而漢京為苑蓋其來久矣志云鎬池在咸陽縣西南二十五里

### 祭

隱元年祭伯來杜注祭國伯爵周公第五子所封地在東周畿內後漢志中年有蔡亭蔡與祭通今

在開封府鄭州  
東北一十五里

凡

隱七年天王使凡伯來聘杜注汲郡共縣東南有凡城臣謹按後漢志共縣有汎亭周凡伯國今

衛輝府輝縣西南  
二十二里有凡城

瓦屋

隱八年宋公齊侯衛侯盟于瓦屋杜注周地臣謹按傳稱會于溫盟于瓦屋瓦屋距溫當不

遠故杜注言周地也或言東昌府濮州觀城縣四十里有瓦屋城即三國會處去溫甚遠不可從

鄔

隱十一年王取鄔劉蒺邠之田于鄭杜注鄔劉二邑在河南緱氏縣西南有鄔聚西北有劉亭蒺邠

鄭邑臣謹按鄔有二後漢書緱氏有鄔聚即此也今在偃師縣西南晉司馬彌牟為鄔大夫在汾

州介休  
東北

劉

見上臣謹按漢志緱氏有劉聚周大夫劉子邑水經注劉水出半石山西北流經劉聚聚三面臨



澗在緱氏西南謂之劉澗西北注合水合水入于洛今緱氏故城在偃師縣西南五十里劉子始封為匡王少子劉康公襄十五年劉夏逆王后于齊昭二十二年子朝之亂劉蚩單旗夾輔王室至貞定王而絕括地志曰劉聚即劉累故城似謬

薦

見上東周大夫子國之食邑謂之薦國

邠

見上臣謹按邠地後屬晉後漢書野王縣有邠城即紂三公鄂侯之所居也鄂一作邠武王以封

其子水經注邠水出太行之阜山南流逕邠城西故邠闕也京相璠曰野王西北三十里有故邠城漢武帝封李壽為侯國今在懷慶府城北三十里有邠臺村野王今河內懷慶附郭邑也

溫

王與鄭人蘇忿生之田溫原締樊隰郟攢茅向盟州陘隤懷杜注蘇忿生周武王司寇蘇公也溫今

溫縣 臣謹按僖十年經書狄滅溫溫子奔衛左傳則曰狄滅溫蘇子奔衛杜注司寇蘇公之後國于溫故曰溫子一國二名且經傳異辭後人因以叢疑鄭樵曰蘇已姓國顓頊裔封于蘇鄴西蘇城是也羅泌曰蘇已姓國懷之武德有古蘇城在濟原西北二里孟之溫縣西南三十里有古溫城為蘇忿生之邑直判蘇溫為二國顯與經傳相戾王氏卮言王與鄭以蘇田十二溫居一焉則始封于蘇而溫特為蘇田耳其後遂以為國斯言諒矣蓋東遷後蘇氏已絕封故田歸王室第觀王與鄭田時特稱其祖父之名即可見矣其後子頽作難因蘇氏復見于經蓋續封而居溫故見滅于狄遂稱溫子也溫滅之後地復歸王更以賜晉至文公十年女栗之盟復見蘇子再絕再續仍就初封尋其蹤跡了了可見至于蘇城之說鄭羅又異鄴似太遠懷為較近武德漢縣漢志沅水東南至武德入

河洸流為濟故有濟原之名度其地在今武陟縣東亦可通也然則羅氏所謂懷之蘇即忿生之初封也所謂孟之溫即續封而尋滅者也原非二國第緣文義少滯遂如乖異耳再按晉受溫邑以狐溱為溫大夫襄公以予陽處父景公以予卻至平公以賜宋樂大心韓宣子以州田易得之中間又嘗屬趙氏故趙文子曰溫吾縣也戰國時屬魏史記魏世家昭王十年齊滅宋宋王死我溫安釐王十年秦軍大梁下子秦溫以和漢于此置溫縣屬河內郡後漢書濟水之所出王莽時大旱枯絕東魏屬武德郡北齊廢隋復置屬懷州唐徙治于李城即今溫縣治也古溫城在縣西南三十里李城者戰國時秦攻趙邯鄲李同帥其徒赴秦軍秦軍退回死封其父為李侯此為封邑也然則溫地乃趙魏分界之處耶

原

見上杜注沁水縣西北有原城臣謹按富辰曰原為文昭蓋絕封而地歸于王也晉受原不服伐

之後趙衰為原大夫故趙同為原屏水經注濟有二源東源出原城今孟州西北九里有古原城路

史曰帝杼即位居原即其地也後改為軹即聶政所居後漢志軹縣有原鄉通典原邑在濟源縣西

今濟源縣西北十五里有原鄉

絺

見上杜注在野王縣西南後漢志波有絺城今在懷慶府城西南三十里俗呼絺城一名付遠城

括地志故絺城在河內縣西三十二里

樊

見上杜注一名陽樊野王縣西南有陽城臣謹按僖二十五年晉侯次于陽樊晉語倉葛曰陽人

有樊仲之官守服虔曰陽城樊仲山父所居故名陽樊後漢志修武縣有樊陽田今濟源縣東南三

十八里有古陽城一名皮子城再按仲山甫為宣王卿士食采于今西安咸寧縣之樊鄉東遷後

子孫再封于河北莊公二十九年樊皮叛王三十年號公入樊執樊仲皮其後遷無終為陽氏

**隰邨**

見上杜注在懷縣西南今懷慶府城西三十里有期城即其地一名覆背村水經注曰湛水

出河內軹縣西北之湛溪自向城東南逕湛城時人又呼曰隰城谿曰隰澗後漢志河陽有湛城是也

**攢茅**

見上杜注在修武縣北京相璠曰河內修武縣北有故隳城謂之皮垣方四百步實中高八

丈際陂水之北隔水十五里有蘭丘得皮垣之半去蘭丘十里又有一丘際陂世謂之勅丘方五百

步與皮垣相類即古攢茅也徐廣曰修武有茅亭今修武縣西北二十里有攢城括地志云攢茅在

獲嘉東北二十五里今屬衛輝府二說異今懷慶府修武縣西北二十里有大陸村即其地

### 向

見上杜注軹縣西有地名向上水經注天漿水出軹罩向城北闕駟十三州志軹縣南山西曲有

故向城竹書曰鄭侯使韓辰歸晉陽及向二月城陽向更名陽為河雍向為高平即是城也括地志

高平故城在河陽縣西北四十里今懷慶府濟源縣西南有向城即周向國

### 盟

見上杜注今盟津臣謹按武王會諸侯于盟津即此也地後歸晉謂之河陽僖二十年天王狩于

河陽是也後屬魏史記趙惠文王十一年董叔與魏氏伐宋得河陽漢置河陽縣屬河內郡晉魏因

之北齊置河陽關周滅齊仍為重鎮隋置河陽宮唐仍曰河陽縣會昌中置孟州于此元豐志云懷

州南至河陽七十里河陽東南至河陰一百六十里金大定中城為河水所壞築城徙治明改州

為縣即今治也古河陽城在縣西南三十里

州

見上杜注今州邑臣謹按周之州邑是時子鄭後又屬晉初為郤稱邑後為欒豹之邑昭三年晉

人以賜鄭豐施七年子產歸州田于韓宣子宣子更以賜宋樂大心後宣子自徙居之漢置州縣屬

河內郡晉因之後魏置武德郡改縣曰邢丘屬懷州大業初又改曰安昌唐武德二年改曰武德置

北義州後廢州縣仍屬懷州宋熙寧中省縣為武德鎮其地在懷慶府東南五十里

陘

見上杜注地關臣謹按輿地志太行陘在懷慶府西北三十里一名丹陘連山中斷曰陘太行首

始河內北至幽州中有八陘此其一也

隕

見上杜注在修武縣北後漢志有隕城今同

懷

見上杜注今懷縣臣謹按懷後屬晉宣六年赤狄伐晉圍懷史記趙成侯四年魏敗我懷又魏安

釐王四年秦拔我懷竹書紀年秦師伐鄭次于懷漢置懷縣為河內郡治晉魏仍之東魏于此置武

德郡北齊廢隋開皇十六年于其地置武陟縣屬殷州今武陟縣西南十一里有懷城

夷

莊十年晉武公伐夷杜注周大夫詭諸采邑未詳

酒泉

莊二十一年號公為王宮于玆王與之酒泉杜注周邑同州澄城縣有溫泉西注于洛又有

甘泉出匱谷中造酒尤美名曰酒泉蓋號地跨河東西

伊川

僖二十二年辛有適伊川杜注周地臣謹按伊源有二水經注伊水出南陽蔓渠山逕陸渾

縣三塗山下合涓水以東注號畧其地即有莘氏女採桑伊川得嬰兒于伊川為伊尹又辛有過伊



川見被髮而野祭者也後漢書伊水出盧氏括地志伊水出盧氏巒山近志伊川出盧氏閭頓嶺東流經嵩縣洛陽偃師入洛水蓋原有二水合流諸家各言所見是以不同耳

### 名

僖二十四年富辰曰召穆公思周德之不類臣謹按召康公邑史記謂召公奭與周同姓左傳召穆公糾合宗族於成周而作詩曰凡今之人莫如兄弟此召公與周同族之証詩譜曰文王受命作邑於豐乃分岐邦周召之地為周公旦召公奭采地受封最先武王克商元子國燕次子仍食召邑扶風郡雍縣南有召亭即其地也皇甫謐有召康公為文王庶子之說或別有本但考文昭十六中無燕國當以史記之說為正春秋所書召伯乃東遷後別受采邑在今絳州垣曲縣之召原後漢志河東垣縣有召亭太平寰宇記召原在王屋山下古今地名云王屋山狀如垣故以名縣元魏以其

地為長平縣屬郃州後周武平元年改為王屋縣  
隋屬郃州唐初為郃伯縣宋為垣曲王屋兩縣皆

名原地今為垣曲縣宋曰垣縣東六十里有名原

甘

信二十四年甘昭公有寵于惠后杜注王子帶食  
邑河南縣西南有甘水後漢志河南有甘城水

經甘水出宜陽縣鹿蹄山東北至河南縣北入洛  
鄭注河南城西二十五里有故甘城俗曰鑿城在

甘水東  
十里

坎

王遂出及坎飲杜注周地在河南鞏縣東地  
道記在縣南京相璠曰鞏地名坎飲在洞水東

司馬彪曰鞏東飲  
聚地道記在南

毛

毛文王子毛伯明封地信  
二十四年狄伐周獲毛伯

隰城

僖二十五年殺太叔于隰城即隰邨見前

翟泉

見成周

榮

文五年王使榮叔歸舍且賄杜注榮采地未詳恐即榮錡氏也見後

暴

文八年公子遂及雒戎盟于暴杜注鄭地臣謹按詩何人斯刺暴公也暴公為卿士而譖蘇公故

蘇公作是詩以絕之曰伊誰云從維暴之云世本曰暴辛公作墳周圻內國路史曰暴辛公采地一

曰暴隧鄭箋謂周圻內無暴者失之

邠

文十七年甘獸敗戎于邠垂杜注垂亭在新城縣北水經注伊水會厭澗水逕邠垂亭服虔

曰邠垂在高都南後漢志新城有高都城今為汝州伊陽縣地

邲

鄆見王

鄆

成十一年周公楚怒而出盟于鄆而入杜注周邑

鄆田

成十一年卻至與周爭鄆田杜注溫別邑河內懷縣西南有鄆人亭今在懷慶府武陟縣

檀

蘇忿生與檀伯達俱封于河杜注河內今在河南懷慶府

溴梁

襄十六年會于溴梁杜注溴水出河內軹縣東南至溫入河臣謹按爾雅梁莫大于溴梁溴

梁水堤也溴水一出陽城西南山一出陽城南溪與龍水會又東南至溫縣入河晉永康二年成都

王頴起兵鄴城與趙王倫將孫會戰于溴水會敗走頴遂長驅濟河又隋仁壽末漢王諒起兵并州

其將余公理與隋將史祥戰于溴水為祥所敗今溴水源在濟源縣西北原山勳掌谷俗呼白澗水

輶

襄二十一年使候出諸輶輶杜注輶輶關在緱氏縣東南後漢志險道名輿地志其阪有十

二曲道將去復還故名一云九十二曲曹參下輶輶氏絕河梁擊趙賁軍破之漢于此置關括地

志輶輶關在緱氏縣東南四十里今河南府鞏縣西南七十里有輶輶山

幽

前見

平時

襄三十年成愆奔平時杜注周邑未詳

雒汭

昭元年趙孟館于雒汭杜注洛水在河南鞏縣南水曲流為汭後漢書鞏縣注夏太康五弟

須于洛汭在縣東北三十里山海經陽虛之山臨于玄扈之水是為洛汭河圖玉版倉頡登陽虛臨

于洛汭之河水經注洛水入河之處清濁異流亦名什谷張儀說秦王曰下兵三川塞什谷之口是

也史記音義鞏縣有郭谷水為什谷隋于此置洛口倉謂洛水東逕洛汭北對瑯琊渚入河謂之洛

口今在河

南府鞏縣

### 三塗

昭四年司馬侯曰四嶽三塗陽城太室九州之險社注三塗在河南陸渾縣南林注山名大行

輶轅穀黽也

臣謹按水經注曰伊水歷崖口山

翼崖深高壁立如闕伊水穿峽北流即古三塗山

武王所南望三塗者也又金志嵩縣有三塗山服

虔以三塗為道春秋晉伐陸渾有事于三塗即知

是山明矣

林注亦非

### 陽城

見上杜注在陽城縣地臣謹按此陽城山也在今河南府登封縣北三十八里俗名車嶺山

亦名馬嶺山晉建興末劉聰將劉雅生攻洛陽守將趙固奔陽城山是也周于其地置潁邑昭元年

天王使劉定公勞趙孟于潁杜注潁水出陽城縣九年晉梁丙張趯率陰戎伐潁杜注周邑是也戰國鄭有陽城疑即潁所改矣史記鄭君乙十一年韓伐鄭取陽城秦亦為陽城縣陳勝陽城人也二世三年沛公自洛陽東還至陽城漢二年使韓王信擊鄭昌于陽城昌降遂置陽城縣屬潁川郡晉仍之屬河南郡後魏置陽城郡隋置嵩州不久皆罷唐屬洛州五代周省入登封縣志云城中有測景臺周公定此地為土中立圭測景漢唐因之

# 太室

見上杜注在河南陽城縣西南林注即中嶽嵩高山也漢志武帝置崇高縣以奉太室山是

為中嶽詩譜即禹貢外方山也東觀記靈帝使崇溪禱雨因其請復稱嵩高山夏之興也有神見于嵩山即此戴延之曰嵩山三十六峰東曰太室西曰少室嵩高其總名也括地志嵩高山在陽城縣

西北二十三里今在  
登封縣北一十里

景毫

湯有景毫之命杜注河南鞏縣西有湯亭或言  
毫即偃師臣謹按輿地志偃師縣南二十里

有景山詩景員維河即此景毫謂在偃師者得之  
或以蒙之北毫為景毫誤矣今偃師鞏縣俱屬河

府南

孟津

武有孟津之會  
即盟津見前

岐陽

見前

鄴宮

見前

閻

昭九年周甘人與閻嘉爭閻田杜注閻嘉晉閻縣  
大夫臣謹按路史曰伯鹵之孫仲奕武王封之



閻一曰昭王少子生而手有文曰閻康王封之閻城一曰唐叔後成公子懿采于閻晉滅之俱不盡合晉滅仲奕之封以賜公子奕耳其地未詳所在第據甘在河南城西則閻亦畿內地此時晉雖歸周至定六年晉閻沒成周則復取之矣

駘前見

郊昭十二年絞奔  
郊杜注周邑

甘鹿昭十七年陸渾衆奔甘鹿杜注周地臣謹按河南府宜陽縣有鹿蹄山甘水所出甘鹿疑以

此得名

北山昭二十二年王田于北山杜注北芒也芒山一作邨山一名平遙山亦邨山之別名也魏文

帝欲平北邙山令登臺便見孟津辛毗諫曰若九河盛溢丘陵皆夷何以禦之乃止宇文泰攻河橋據北邙為陳李密攻王世克自引精兵出偃師阻北邙以待之蓋洛陽形勝地也今在河南府城北十里山連偃師孟津鞏三縣綿亘四百里東漢諸陵及唐宇諸名臣墓多在此

榮錡氏

周景王崩于榮錡氏杜注河南鞏縣西有榮錡澗今同

要餞

昭二十二年子朝帥要餞之甲以逐劉子杜注周二邑水經注畛水出新安縣青要山今謂

之疆山山海經青要之山畛水出焉新唐書河南郡諸府有餞濟

揚

劉子奔揚杜注周邑揚雄傳曰其先出自有周伯僑者以支庶初食采于晉之揚因氏焉揚在河

汾之間路史曰宣王子曰尚父幽王封之曰揚侯其地平陽揚氏縣漢之河東縣也

領

樊頃子追單子及領杜注地名

京

子朝奔京當即京索之京在今開封府滎陽縣見鄭國京城潞安平遙縣東七里有京陵城周宣王北伐時所築或云即此京也按此時地已入晉非是

皇

王猛居于皇杜注河南鞏縣西南有黃亭後漢志有湟水即皇也水經注雒水合于谿泉又東濁水注之古湟水也京相璠曰訾城北二里有黃城今在鞏縣西北

圃車

王如平時遂如圃車圃車周地

前城

司徒醜以王師敗績於前城杜注子朝所得邑臣謹按後漢志雒陽西南有前亭為泉戎所居服虔曰前讀為泉即泉戎地在伊闕南水經注伊水自新城又北徑前亭西即傳之前城也京相

璠曰在今洛陽西南五十里伊闕外僖十一年楊拒泉臯伊洛之戎同伐京師所謂泉臯即泉戎也又故洛城西有戎城則伊洛之戎也

東園

單氏伐東園杜注洛陽東南有園鄉路史周地有東西園東園即園鄉也

社

前城人敗陸渾于社杜注周地臣謹按黃河西自偃師界至鞏縣洛水入之有五社渡又為五社

津光武帝幸懷遣耿弇等軍五社津備滎陽以東即此

陰

晉籍談軍于陰臣謹按杜佑曰唐河清縣左傳所云晉陰也漢平陰縣地晉及後魏為河陰縣地

隋省河陰縣唐武德二年置大基縣屬懷州八年省後復置改曰河清會昌三年改置孟州後州廢縣仍屬河南府宋移治于白坡鎮金人移治于河南岸改曰孟津縣即今河南府孟津縣治也其唐

初河清古城在今孟縣西南五十里

侯氏

荀躒軍于侯氏杜注周地臣謹按侯氏疑卽緱氏偃師縣東南二十里有廢緱氏城後漢建

武九年上幸緱氏登輶轅是也又南十里為緱氏山卽王子晉學道處

谿泉

賈辛軍于谿泉杜注鞏縣西南有明谿泉今屬河南府水經注洛水又東明樂泉注之世謂五

道泉卽古明谿泉也

汜

王師軍于汜于解于任人杜注王師分在三邑臣謹按汜地有四此王師軍于汜蓋成臯之汜也

漢四年漢挑戰成臯大司馬咎渡兵汜水漢大破楚軍大司馬咎長史欣皆自剄汜水上臣瓚曰成臯城東汜水是也師古取之漢成臯縣屬河南郡隋改曰汜水唐初析置成臯貞觀中省入汜水至

今因之本屬鄭地王時駐軍于此至于僖二十四年王適鄭處于汜即今襄城縣僖三十年晉秦圍鄭秦軍汜南在中牟縣南皆非此汜詳見鄭地又漢高祖即位于汜水之陽則在定陶屬濟陰郡叔孫通傳曰漢王已并天下諸侯共尊為皇帝于定陶乃其證也曹咎自劉汜水條張晏注曰汜水在濟陰界乃誤以為定陶之汜也如淳引左傳鄆在鄭地汜乃誤以為襄城之汜也師古並加駁正良是後漢志成臯有汜水乃襄王出居處亦誤也成臯襄城中牟之汜讀曰凡鄉人呼之曰祀定陶之汜音敷劔反音聲各別字畫亦有微分也

### 解

見上杜注洛陽西南有大解小解後漢書洛陽大解城洛陽故城之西南又有小解國策蘇代謂

向壽曰公與楚解口地封小令尹以杜陽解口即兩解城也

任人見上

京楚

王師軍于京楚

鄆

昭二十三年郊鄆潰杜注河南鞏縣西南有地名鄆中郊鄆二邑皆子朝所得臣謹按後漢志有

尋谷水史記張儀下兵三川塞什谷之口徐廣曰即鄆邑京相璠曰今鞏洛渡北有鄆谷水東入洛謂之下潯亦謂之北潯是即杜氏所本也蓋古有上潯下潯南潯北潯之名括地志故鄆城在鞏縣西南五十八里輿地志偃師東北十四里有鄆溪是又鄆之支流耳或謂即夏之斟鄩誤斟鄩在北海郡平壽縣

平陰

昭二十三年晉師在平陰杜注今河陰縣臣謹按平陰古為津濟處陳平降漢王使參乘監

諸將南渡平陰津至洛陽是也後置平陰縣屬河南郡武帝封劉遂為侯邑十三州志縣在平津大河之間故名魏文帝改曰河陰晉因之永嘉五年傳祇建行臺于河陰後魏太和二十年營方澤于河陰東魏分置河陰郡于此隋初郡縣并廢王世充復置武德初又廢今故城在孟津縣東一里舊志云在洛陽城東北五十里若今河陰縣乃唐開元二十年割汜水滎澤二縣地所置非晉時舊縣也

澤邑

王師在澤邑賈逵曰澤即翟泉也見前

狄泉

即翟泉見前

訾

昭二十三年單于取訾杜注訾在河南鞏縣西南臣謹按路史曰訾有二西訾在洛東訾在鞏單



子所取蓋西訾也二十四年河津人得王子朝用于河之寶珪陰不佞拘之王定而獻與之東訾二十七尹文公焚東訾始為鞏縣之訾杜氏誤以二訾為一故兩注無異辭也後漢志鞏有東訾聚今名訾城水經注洛水東逕訾城北潯水及東羅水注之晉石勒攻趙出于訾鞏之間皆言東訾章懷注後漢書即引杜注如果二訾為一傳文東字不亦贅乎

墻人

劉子取墻人直人墻一作嗇路史曰嗇唐也今新安縣東北有白墻村金水發源處

直人

見上杜注子朝邑直伯柄國

尹

王入于尹杜注尹氏之邑今山西汾州有尹吉甫墓即古尹城也

阪道

單子從阪道未詳臣謹按偃師東南有鄂里阪鞏縣東南有鞏轅阪宜陽東南有九曲阪未

詳孰是

尹道

劉子從尹道當即入尹之道

左巷

子朝次于左巷杜注近東城

唐

尹辛敗劉師于唐杜注周邑後漢志有唐聚在今河南府洛陽縣

西闡

尹辛取西闡杜注周地未詳臣謹按有東圍即有西圍西闡當是西圍之訛

蒯

尹辛攻蒯杜注河南縣西南蒯亭今在洛陽縣西南道記曰河南縣西南有蒯亭今在洛陽縣西南晉地

三川

昭二十三年荄弘曰周之亡也三川震杜注涇渭洛水也渭河在今陝西西安府城北五十

里出臨兆府渭源縣界鳥鼠山西北谷東流經蓋屋興平咸陽渭南至華陰縣入黃河涇河發源平

涼府界岍頭山經邠州醴泉涇陽至高陵縣入渭  
洛水出慶陽府北經上郡雕陽秦望山南過寧州  
東六十里之廢襄樂縣三川  
舊屬西周後為秦晉所有

乾祭

昭二十四年士景伯立于乾祭杜注王城北門  
後漢書王城東門名鼎門北城門曰乾祭皇

覽曰城西北柏亭西周山上有周靈王冢民祀之  
不絕水經注穀水又東遶乾門北于朝之亂晉所  
開也其東即千金塢又東為  
金谷水水之西北即金墉城

瑕

昭二十四年子朝之師攻瑕及杏皆潰杜注曰敬  
王邑臣謹按燭之武對秦伯許君焦瑕此晉瑕

也與子朝所  
攻為兩地

杏

見上洛陽記禹  
州城北有杏山

鞏

昭二十五年尹文公涉于鞏杜注於鞏縣涉洛水也臣謹按傳曰闕鞏之甲鞏之得名已久周為

鞏伯邑爾雅曰鞏固也四面有河山之固也西周惠公封少子班于此為東周史記秦莊襄王元年蒙驁代韓韓獻成臯蓋東周亡于是年也漢三年項羽拔成臯欲西漢兵距之鞏令不得西後置縣于此其地在今縣西南三十里有鞏王城相傳為赧王所築者是也隋遷洛口倉始為今治李密據之築城以斷洛川包南北山周迴三十餘里

尸氏

昭二十六年劉人敗王城之師于尸氏杜注在鞏縣西南偃師城臣謹按班固曰尸鄉殷湯

所都也故有湯亭皇甫謐以為帝嚳都非湯也又有言盤庚遷之者世遠莫考穆天子傳召伯逆王于尸後漢書尸鄉春秋時曰尸氏水經注尸鄉在偃師縣西三十里漢初曹參還擊秦將趙賁于尸

北又田橫乘傳詣洛陽至尸鄉廐置遂自劉今有  
田橫墓晉太康地記尸鄉南有亳坂東有桐城太  
甲所放處湯墓在焉搜神記曰祝  
雞翁洛陽人也居尸鄉北山下

施谷

戰于施谷杜  
注周地未詳

渠

昭二十六年劉子以王出次于渠杜注周地臣  
謹按渠陽渠也陸機洛陽記劉澄之永初記言城

西面有陽渠周公之所制也亦謂之九曲瀆在河  
南鞏縣西通洛陽晉書曰洛陽十二門皆有雙闕

石橋跨陽渠述征記曰東城有二石橋舊于王城  
東北開渠引洛水名曰陽渠東流經洛陽于城東

南回通出石橋下運至建春門以輸常滿倉水經  
注上東門外石橋右柱銘陽嘉五年詔書以城下

漕渠東通河濟南引江淮方貢委輸所由而至乃  
作石橋此即陽渠與穀水回通處也輿地志洛陽

城外四面有陽渠水周公所鑿也其水上源從函谷東流注城西北角仍分流繞城至建春門外合流又折而東云

褚氏

王宿于褚氏杜注洛陽縣南有褚氏亭後漢書志洛陽有褚氏聚今未詳

萑谷

王次于萑谷于胥靡于滑杜注皆周邑胥靡滑本鄭邑臣謹按大谷在洛陽東後漢書孫堅

進軍大谷距洛九十里其谷連亘至潁陽縣何進設八關大谷其一也周之萑谷施谷蓋皆大谷之支徑耳又按孔安國書傳說隱于虞虢之間皇甫謐曰高宗夢天賜賢胥靡之衣乃以其形旁求于天下見築者胥靡衣褐帶索執役于虞虢之間傳巖之野今虞山東南有傳巖東北十里有顛軫阪當由傳說傭隱止息于此故以胥靡名其地也再按滑國名秦滅之而不能有為晉所得然

其地近鄭在所必爭成十七年鄭人所以侵晉虛滑也是時則歸王室逮定六年鄭伐周馮滑胥靡此鄭人爭滑之驗也古緱氏城即滑國城

胥靡

見上

滑

見上

闕塞

晉師納王使女寬守闕塞杜注洛陽西南伊闕口也臣謹按今河南府城南三十里有闕塞

山一名龍門一名伊闕一名闕口一名鍾山志云山之東曰香山西曰龍門大禹疏以通水兩山對峙石壁峭立望之若闕伊水歷其間陸機曰洛有四闕此其一焉戰國策秦攻魏將犀武軍于伊闕史記秦昭王十四年白起攻韓魏之師于伊闕四十年西周君與諸侯約從將天下銳兵出伊闕

即此也漢靈帝時為河南八關之一北魏景明初嘗遣宦者白整鑿二佛龕于龍門其後宦者劉騰復鑿一龕皆高百尺用功數十萬熙平初胡太后作石窟寺于伊關口極土木之美隋煬帝登北邙望伊關顧謂侍臣曰得非龍門耶自古何以不建都于此蘇威進曰以待陛下耳遂議定都詔令楊素營之

莒

昭二十六年陰忌奔莒杜注周邑臣謹按國語有曹姓之莒莒興期本已姓與陸終曹姓之莒自別或言周滅莒以其地封興期者非也興期都介根乃古國

圍澤

遂軍圍澤次于堤上杜注皆周地臣謹按圍澤當即東園之澤見前又周有圍門恐皆以此

名得



堤上

見上

臣謹按漢書漢孝文時河決酸棗東潰金堤寔宇記金堤在洛陽縣西南二十三里從

陽武縣東北五十八里入洛陽西南界又入滑州靈昌縣界時漢興未四十年河道始決金堤係三

代時物明矣所云堤上或即此也

羗

厲王居于羗本禹貢岳陽也漢為羗縣屬河東郡東漢改永安縣隋義寧初置霍山郡唐罷郡置呂

州貞觀中州罷以縣屬晉州宋屬平陽府今為霍州屬平陽州南有羗水有羗城東南有厲王墓如故

鄭

昭二十九年趙車入于鄭以叛杜注周邑未詳

馮

定六年鄭伐馮滑胥靡負黍狐人闕外杜注鄭伐周六邑臣謹按東觀記曰魏之別封曰華侯華

侯孫長卿食采馮城路史曰畢公後采馮亭春秋  
有馮簡子杜云歸姓後漢馮魴亦云魏之支庶采  
馮城說文云邠姬姓國今范陽李澤中有馮水即  
故馮地古馮夷國范陽非周地當以畢公畿內馮

亭為

正

負黍

見上杜注陽城西南有負黍亭臣謹按後漢  
志陽城有負黍聚路史曰孟子舜遷于負夏世

紀作舜遷于負黍少室一曰黍室負黍城在其南  
潁水經其東南為許由隱處馮衍顯志賦曰求善  
卷之所在過許由于負黍是也京相璠曰負黍在  
潁川陽城縣西南二十七里今謂之黃城史記鄭  
繻公十六年伐韓敗韓兵于負黍鄭君乙二年負  
黍反復歸韓韓世家宣惠王十九年秦拔我陽城  
負黍又楚世家悼王九年伐韓取負黍索隱韓世  
家贊曰既徙平陽復侵負黍韓自武子都平陽哀

侯滅鄭侵負黍者由此以

狐人

見上杜注周邑 臣謹按後漢志潁陰縣有狐宗鄉或曰古狐人亭即其地今在開封府許州

或謂即巽狐聚者非

闕外

見上杜注周邑 疑即伊闕之外邑也

姑稽

天王處于姑稽杜注周地未詳

儀栗

定七年周儋翩入于儀栗以叛杜注周邑未詳開封東緡二十里有儀城

窮谷

定七年敗尹氏于窮谷杜注周地 臣謹按新唐書開封軍府有通谷即洛神賦所謂經通谷

也昔人嫌里名不美輒舉相反者以易之如楚窮水易豐水之類是也窮谷易為通谷意亦如此

穀城

定八年單子伐穀城單子伐簡城劉子伐孟杜注穀城在河南縣西臣謹按漢穀城縣屬河

南郡范志曰澗水出今洛陽縣西北穀水之東岸

有穀城山即其地也徐廣曰周亡所存止七縣穀

城與焉西晉併入河南故有城存魏大統四年東

魏侯景圍金墉宇文泰赴救至穀城北齊常山王

演增築穀城置戍以

備周師謂之嚴城

簡城

見上臣謹按周有簡師父簡城當是其食邑路史曰簡者耿後少昊之苗裔也

孟

見上或云孟即邾也

春秋地名攷畧卷一

欽定四庫全書

春秋地名攷略卷二

詹事府詹事高士奇撰

魯

國于曲阜

史記武王十一年封周公旦于曲阜是為魯公周公不就封留佐武王于是卒相成

王而使其子伯禽代就封于魯曲阜少皞之墟也定公四年祝佗曰因商奄之民命以伯禽而封于少皞之墟杜注曲阜也在魯城內昭公二十有九年蔡墨曰少皞氏有四叔世不失職遂濟窮桑杜注窮桑少皞之號也地在魯北帝王世紀少昊帝是為玄囂降居江水有聖德邑于窮桑以登帝位

都曲阜尸子少昊金天氏邑于窮桑日五色下照窮桑拾遺記皇娥生少昊號曰窮桑一曰桑丘氏皆是說也應劭曰曲阜在魯城中委曲長七八里自春秋至戰國魯世世都之後并于楚秦為薛郡治漢五年封項羽為魯公後置魯縣封功臣奚涓為侯邑高后初改為魯國晉為魯郡治宋及後魏因之後齊改屬任城郡隋開皇三年廢郡改縣曰汶陽屬兗州十六年又改曰曲阜縣唐省而復置宋大中祥符五年改仙源縣金復為曲阜元遷縣治於魯城東十里謂故城為闕里明正德七年流賊陷城乃復徙於故城中今縣治是也魯故城十二門今環城基址尚存有如山嶺臣謹按後漢志魯國即奄國而杜預不主是說其注因商奄之民句曰商奄國名也與四國流言或迸散在魯皆令即屬魯懷柔之昭元年商有徐奄杜注二國皆嬴姓昭九年詹桓伯曰蒲姑商奄吾東土也無注

再按書序成王東伐淮夷遂踐奄因以封周公夫  
周公已封于武王時成王乃以奄地益之其非一  
地可知矣又史記云從郭出魯奄中張茂先云即  
魯之奄里亦曰商奄里又名奄里鄉皆謂奄國與  
魯為兩地孔穎達云奄東方之國近魯之地是矣  
今志言曲阜舊城即古奄地或言奄城在縣東二  
里再按羅泌謂曲阜之窮桑乃空桑也山海經  
空桑之北有軒轅山或又云空桑氏以地紀空桑  
者堯鹵也高陽氏所常居非少昊之都也紀年云  
少昊帥鳥師居西方疑窮桑在雍梁之間馬氏繹  
史正之謂少昊居西方乃侯伯之任及登為帝則  
居曲阜賈逵曰少昊居窮桑登為帝是也山海經  
所謂空桑即窮桑之别名耳其說與左傳合又帝  
王世紀黃帝生于壽丘在魯東門之北此蓋亦山

海經  
之說

茂

隱元年盟于茂公羊作昧杜注茂姑茂魯地魯國  
卞縣南有姑城 臣謹按定公十二年公登武子

之臺費人攻之仲尼命申句須樂頎下代之費人  
北國人追之敗諸姑茂即此茂也漢卞縣隋改置

泗水縣括地志云茂姑故城在泗水縣東北四十  
五里今泗水縣屬兗州府鄭樵通志曰兗州瑕丘

縣有姑  
茂城誤

郎

隱元年費伯帥師城郎杜注魯邑高平方與縣東  
南有郁郎亭 臣謹按桓四年公狩于郎八年師

次于郎以俟陳人蔡人十年齊侯衛侯鄭伯來戰  
于郎莊八年師次于郎以俟陳人蔡人十年齊師

宋師次于郎三十一年築臺于郎昭九年築郎囿  
皆此也蓋魯之邊邑漢王子侯表魯共王之子驕

封郁根侯師古曰根音狼漢方與縣屬山陽郡晉  
屬高平國即今魚臺縣也詳棠下縣治東北九十



里有郁根亭括地志郎亭  
在滕縣西五十二里誤

費

見上臣謹按此魯大夫費彥父之食邑讀如字  
與季氏費邑讀曰秘者有別晉書地道記湖陸西  
有費亭城魏武封費亭侯即此  
今兗州府魚臺縣西南有費亭

潛

隱二年公會戎  
于潛杜注魯地

唐

隱二年公及戎盟于唐杜注高平方與縣  
北有武唐亭今在魚臺縣東十二里

崇

隱五年公觀魚于棠公羊濟上之邑也杜注今高  
平方與縣北有武唐亭魯侯觀魚臺臣謹按水

經注河水又東經武唐亭有高臺二丈許其下臨  
水昔魯侯觀魚處地後屬宋名方與戰國策楚人  
說頃襄王外擊定陶則大宋方與二郡舉矣秦置  
方與縣史記二世二年秦嘉立景駒為楚王引兵

之方與欲擊秦軍定陶下又沛公取胡陵方與漢  
仍置方與縣屬山陽郡方與讀曰房預晉屬高平  
國宋魏因之齊廢隋復置屬徐州唐初屬金州貞  
觀中改屬兗州寶應元年改名魚臺縣取觀魚臺  
為名元和四年淄青帥李師道請移縣治于魚臺  
市即今縣治也五代唐屬單州宋因之元屬濟州  
明初屬徐州尋改屬濟寧府洪武十八年改屬兗  
州府今仍之故方與城在城北觀魚臺在縣東北  
十二里荷水  
在縣北十里

### 中丘

隱七年城中丘杜注在瑯琊臨沂縣東北  
謹按隱十年公會齊侯鄭伯于中丘即此水經

注沂水自中丘城西而南逕臨沂城是也今兗州  
府沂州東北有中丘城或謂之諸葛城以諸葛武  
侯隱居瑯琊時嘗居此也臨沂縣後  
漢屬瑯琊國晉因之即今沂州治

泰山

隱八年鄭伯請以泰山之祊易許田 泰山在今泰安州北五里詩泰山巖巖魯邦所瞻戰國

策蘇秦說齊宣王齊南有泰山東有瑯琊史記貨殖傳其陽則魯其陰則齊山之東北址舊有明堂

為成周朝會諸侯之處

防

隱九年公會齊侯于防杜注魯地在瑯琊華縣東南十年敗宋師于菅辛巳取防杜注高平昌邑

縣西南有西防城 臣謹按魯有三防華縣之防所謂東防也莊二十二年及齊高彘盟于防二十

九年城諸及防又襄十二年城防皆此邑也為臧氏食邑故十七年齊高厚圍臧紇于防二十三年

臧紇自邾如防漢華縣屬泰山郡後漢并入費縣晉復置屬瑯琊郡後廢今費縣西北六十里有華

城昌邑之防宋防也既為魯有欲別於臧氏之防故謂之西防王莽末佼疆為西防賊帥後附劉永

永敗於睢陽疆奔保西防即此章懷太子曰西防在單縣北四十里昌邑漢縣武帝以封子髆王賀廢國除為山陽郡晉為高平國皆治昌邑劉宋移高平國治高平縣省昌邑入金鄉今金鄉縣西北四十里有昌邑城僖十四年季姬及鄆子遇于防此季姬名鄆子至魯蓋魯國之防山也孔子遇于防合葬于防即此今防山在曲阜縣東二十里張浴集傳密州諸城有防城此因經文有城諸及防之語而誤也又青州府安丘縣有防城乃莒邑詳見莒地

鄧

隱十年盟于鄧杜注魯地路史黃帝臣鄧伯溫國與南陽子姓之鄧有別

菟裘

隱十一年傳使營菟裘杜注魯邑在泰山梁父縣南後漢志梁父有菟裘聚寰宇記菟裘故

城在泗水縣北五十里梁父漢縣亦在其北今泗水縣北四十里有梁父城菟裘聚在縣西北

許田

桓元年鄭伯以璧假許田  
四十里有魯城鄭伯請以泰山之枋易許田而

祀周公即此許昌  
城在州東三十里

謹

桓三年齊侯送姜氏于謹杜注魯地濟北蛇丘縣  
西有下謹亭 臣謹按定八年陽虎入謹陽關以

叛哀八年齊人取謹及闡既而復歸于我皆此也  
亦作鄗水經注蛇水逕下謹亭路史濟之乘丘有

驪亭或云謹堯國即蛇丘下謹亭唐入鉅野後為  
濟治今在寧陽縣西蛇丘漢縣屬泰山郡後漢晉

宋屬濟北國魏屬東濟北郡北齊  
廢索隱下謹亭在下博縣西南

成

桓三年公會杞侯于成公羊杞作紀成作威穀梁  
傳范甯注云魯地 桓六年公會紀侯于成穀梁

作邲杜注在泰山鉅平縣東南 臣謹按莊三十  
年次于成備齊也又襄十五年齊人圍成公救成

於是城成郭十六年齊復圍成後為孟氏邑昭七年晉人來治祀田季孫以成與之後復歸魯二十六年齊師圍成弗克定十二年仲由為季氏宰將墮成公斂處父謂孟孫墮成齊人必至于北門且成孟氏之保障也無成是無孟氏也子偽不知我將不墮于是公圍成勿克哀十五年成叛入于齊孟武伯伐成不克遂城輸以逼成既而齊歸成禮記檀弓子羔為成宰史記齊宣公四十八年田和取魯之成邑皆此也漢置鉅平縣屬泰山郡晉宋及後魏因之後齊廢括地志鉅平城今為故城社汶水經其東上有文姜臺其東南即魯之故成邑今寧陽縣東北九十里有鉅平城

祝丘

桓五年城祝丘莊四年夫人姜氏享齊侯于祝丘杜注魯地路史祝丘祝融氏之後臨沂東

南五十里有即丘城漢為即丘縣孟康曰春秋時之祝丘也屬東海郡後漢屬瑯琊魏晉因之劉宋

為瑯琊郡治後魏因之齊廢郡并縣入臨沂今沂州東南五十里有即丘城

二山

桓六年子同生傳申繻曰先君獻武廢二山杜注二山具教也獻公名具武公名教更以其鄉

名山 臣謹按嵒山在今泰安州新泰縣東南十里即教山也具山在嵒山東南二十五里

咸丘

桓七年楚咸丘杜注魯地高平鉅野縣南有咸亭 臣謹按水經注黃水逕鉅野縣北又東逕

咸亭北其水大河之支河也水南即金鄉之東界鉅野漢縣屬山陽郡晉屬高平國金省元復置今屬濟寧州縣南有咸亭 再按公羊曰咸丘邾婁之邑也穀梁曰其不言邾咸丘何也疾其以火攻

也似誤

夫鍾

見邾國

闕

桓十一年公會宋公于闕杜注魯地在東平須昌縣東南臣謹按昭二十五年叔孫昭子如闕三

十二年公在乾侯取闕定元年季孫使役如闕杜氏云闕魯先公墓所在也自隱桓以下皆葬此戰國策信陵君曰秦長驅梁北東至陶衛之交北至平闕陶陶丘平平陸也後漢志云東平陸有闕亭皇覽曰蚩尤冢在東郡壽張縣闕鄉城中嘗十月祠之有赤氣如血曰蚩尤旗史記封禪書齊八神三曰兵主祠蚩尤正義蚩尤冢在東平陸監鄉監即闕也水經注洪水上承鉅野薛訓渚歷澤西北又北經闕鄉城西又北與濟瀆合今汶上縣西南三十五里有南旺湖湖中有闕亭其地高阜六七即魯先公葬處東平陸漢縣在今東平州汶上縣北須昌漢縣晉為東平國治故城在今東平州北十五里壽張漢屬東平國在今壽張縣東南五十里蓋南旺湖即古鉅野大澤周百餘里環湖之邑



皆可屬之諸書各以當時所屬為言故不同也

曲池

桓十二年盟于曲池杜注魯地魯國汶陽縣北有曲水亭水經注汶水又西南逕汶陽縣北

王莽之汶亭也縣北有曲水池亭今在曲阜縣東北四十里

趙

桓十七年盟于趙杜注魯地

奚

桓十七年戰于奚毅梁作郎杜注魯地

莒

莊九年公及齊大夫盟于莒杜注魯地瑯琊繒縣北有莒亭後漢志繒縣有莒亭路史曰沂之丞

有莒亭即古莒國繒縣即鄆國在今嶧縣東八十里

洙

莊九年冬浚洙杜注洙水在魯城北下合泗浚深之為齊備水經注洙水出泰山蓋縣臨樂山北

西南流至卞縣西南入泗水又亂流西南至魯縣  
東北分為二流北為洙濟南即泗水孔子設教于  
洙泗之間闕里是也洙水又南經瑕丘城下流復  
入泗通志洙水故道自縣東北經孔林西而入泗  
今曲阜縣北二里有洙水不復與泗通上流在孔  
林東止一溝瀆過夫子墓前西南流入于沂其故  
道不可考矣

生竇

莊九年殺子糾于生竇杜注魯地史記作笙  
瀆賈逵曰魯地句瀆也句瀆即句陽縣春秋之

穀丘也句陽城在今曹縣東北三十里濮  
水所逕為齊魯交境按穀丘乃宋地俟考

長勺

莊十年公敗齊師於長勺杜注魯地路史曰  
成王以商民六族錫魯公有長勺氏尾勺氏此

商民之所居也

乘丘

莊十年公敗宋師于乘丘杜注魯地臣謹按戰國策張儀謂魏王齊伐趙取乘丘收侵地虛

頓丘危史記周安王二年三晉伐楚至乘丘而還即此也漢置乘氏縣屬濟陰郡景帝封梁孝王子

買為侯邑應劭曰故春秋時乘丘也和帝又以封梁商晉屬濟陰郡後魏仍屬濟陰郡隋屬曹州唐

宋仍之金廢今乘氏故城在曹縣東北五十里再按西漢泰山郡有乘丘縣師古曰即春秋乘丘

也武帝封中山靖王子將夜為侯邑水經注洸水自寧陽又西南經乘丘故城東括地志乘丘在瑕

丘縣西北三十五里今兗州府西北二十五里有古瑕丘城曲阜在兗東三十里以是計之乘丘去

魯都不及百里矣時公子偃自雩門竊出敗宋師必寇在門庭故能出不意薄之也若乘丘在曹縣

則相去三百里無用竒之法矣應說當誤顏氏為優又隋志分鉅野置乘丘縣尋省此則近乘氏國

策所謂趙乘丘也

雩門

莊十年公子偃自雩門竊出杜注雩門魯南城門臣謹按魯國都其城十二門正南曰稷門

南之左曰章門右曰雩門正北曰圭門北之左曰齊門右曰龍門正東曰建春門東之左曰歸德門右曰明門右曰鹿門正西曰史門西之左曰歸德門右曰麥門杜預曰魯有東城南城有上東等門左傳定八年公斂處父帥成人自上東門入與陽虎戰于南門之外上東門蓋城東之北門又國語臧文仲祭爰居于魯東門之外襄二十三年臧紇斬鹿門之闕出奔邾白褒魯記曰鹿門有兩井一為臧武仲井一為季桓子井國語桓子穿井得土缶中有羊以問仲尼者也雩門以面臨雩水得名隔水有雩壇高三丈莊十年公子偃自雩門竊出蒙臯比而犯宗師又哀十一年冉有帥左師次于雩門之外

水經注沂水有二一出尼丘山西北經魯雩門即  
曾點浴沂處是也莊三十二年圍人犇能投蓋于  
稷門定五年陽虎盟季桓子于稷門之內又哀八  
年吳伐魯微虎欲以私屬徒宵攻吳及稷門之內  
而止亦謂之南門僖二十年新作南門傳曰本名  
稷門僖公更高而大之故名高門定十年齊人陳  
女樂文駟於魯城南高門外即此矣門內有闕雞  
臺二所昭二十五年季郈之雞闕括地志闕雞臺  
二相距十五步是也又有郭門西郭門也曰子駒  
之門文十一年獲長狄僑如埋其首于子駒之門  
又萊門則東北郭門也哀六年齊人召公子陽生  
陽生請與南郭且于乘出萊門而告之故或曰萊  
門即陽關邑門也又有爭門吏門石門公羊傳齊  
桓公使高子將南陽之甲立僖公而城魯或曰自  
鹿門至於爭門或曰自爭門至於吏門是也爭門  
一云當作淨門淨魯北門池也吏門即史門矣呂

氏春秋歸父居石門石門蓋亦郭門地也

郭

莊十一年公敗宋師于郭杜注魯地

濟西

莊十八年公追戎于濟西杜注戎來侵魯公逐之于濟水之西莊三十年公及齊侯過于魯

濟杜注濟水歷齊魯界在齊界為齊濟在魯界為魯濟蓋魯地僖三十一年取濟西田左傳分曹

地也公羊傳曰惡乎取之取之曹也晉侯執曹伯班其所取侵地于諸侯杜注二十八年晉文討曹

分其地竟界未定至是以賜諸侯左傳分曹地自洮以南東傳於濟杜注濟水自滎陽東過魯之

西至樂安入海宣元年齊人取濟西田杜注濟西故曹地僖三十一年晉文以分魯宣十年齊

人歸我濟西田臣謹按漢志濟水過郡九行千八百四十里至瑯槐入海九郡謂河東河內陳留

梁國濟陰泰山濟南齊郡千乘也水經注濟水出河東垣縣王屋山至鞏縣截河而南為滎澤過宛句定陶西東流濟陰乘氏縣西分為二瀆其南瀆為沂水東南流至山陽湖陸縣與泗水合而入淮其東北流入鉅野澤又東北過東郡壽良縣西界北逕須昌穀城又東北逕廬縣華不注山臺縣管縣梁鄒臨濟樂安而入于海杜氏所謂歷齊魯界者即東北分流一支其在鉅野壽良須昌則穿曹魯之境謂之魯濟其在穀城以下則穿齊衛之境所謂齊濟也鉅野今亦為縣壽良即今壽張須昌在今東平州穀城在今東阿縣此齊魯分界也追戎濟西即已氏之戎在今曹縣境者隱元年會於潛七年伐凡伯皆此戎也今曹州即古曹國與魯之東鄆鉅野相接所爭濟西田蓋在此襄十八年晉侯伐齊沈玉濟河會于魯濟此則東平之魯濟也國語齊桓公反魯衛燕地正封疆地南至於陶

陰西至於濟北至於河定八年齊與衛地自濟以西  
襍媚杏以南書社三百是則齊衛分境之齊濟也  
戰國策燕王謂蘇代曰齊有清濟濁河可以為固  
樂毅伐齊戰于濟西齊師大敗遂入臨淄蓋漢以  
前濟水經流之跡若此酈道元曰王莽之世川瀆  
枯竭濟水便入于河不復絕流而南其餘流自東  
平以東北者皆謂之清水杜佑曰濟水絕流已久  
今自東平以東北入海者實荷澤汶水之合流耳  
諸史由是但言清河無復濟水之名至元人於寧  
陽縣築桐城壩過汶水入洸以通運河明永樂中  
又于東平州東築戴村壩盡過汶水入會通河說  
者謂大清河古濟而今汶者也經此二變濟瀆故  
跡遂不可復考今曹縣北三十里及定陶諸境猶  
有故濟堤即魯濟昔日經流處

洮

莊二十七年公會杞伯姬于洮杜注魯地  
年盟於洮杜注魯地臣謹按僖三十一年取濟



西田分曹地自洮以南東傳於濟故曹地亦有洮之名水經注鄆城西南五十里有桃城或謂之洮瓠子河所逕亦曰姚城因姚墟而得名也援神契舜生姚墟應劭曰姚墟與雷澤相近世稱姚城即春秋分曹地自洮者也今在濮州西南五十里張洽集傳洮在濟南府誤

### 郟

莊二十八年冬築郟公穀皆作微杜注魯下邑臣謹按水經注濟水經梁山東又逕微鄉東京相璠曰壽張縣西北三十里有故微鄉王氏曰微子所封國也今壽張縣東南五十里有古壽張城

### 諸

莊二十九年城諸及防杜注諸今城陽諸縣臣謹按文十二年季孫行父城諸及鄆即此諸也地在石屋山東北濰水之南漢置諸縣屬瑯琊郡晉屬城陽國劉宗屬東莞郡魏因之北齊省入東武隋改東武為諸城即今縣治也古諸城在今治西南三十里

魯濟

見濟西

薛

莊三十一年築臺于薛杜注魯地

秦

莊三十一年築臺于秦杜注東平范縣西北有秦亭臣謹按魏叔志東平郡嘗治范縣之秦城即

此志云縣東北四十餘里有魯西門舊有石門高數尺蓋魯衛之境今范縣南二里有秦亭

梁丘

莊三十二年齊侯宋公過于梁丘杜註梁丘在昌平邑縣西南臣謹按昌邑在今金鄉縣

見防縣西南有梁丘鄉即齊宋相遇處括地志梁丘城在城武縣東北三十二里蓋接界處也今城

武縣東北三十里有梁山

黨氏臺

莊三十三年築臺臨黨氏杜注黨氏魯大夫今曲阜縣東北八里故魯城內有莊公臺

稍西南又  
有昭公臺

稷門

見雩門

逵泉

公子牙歸及逵泉卒杜注魯地臣謹按寰宇記云逵泉在曲阜東南十里源出平澤合沙溝

共流數里以入於沂名曰逵泉溝一名連泉今縣南五里有逵泉其旁又有茶泉車輞泉柳青泉兩觀泉凡五泉上有龍祠漕河志云縣境之泉凡二十二其五入泗其十六入沂其一入洸

密

閔二年共仲歸及密乃縊杜注魯地瑯琊費縣北有密如亭今在費縣北

鄆

僖元年公子友敗莒師于鄆公羊作犁穀梁作麗杜注魯地

汶陽田

僖元年公賜季友汶陽之田及費杜注汶陽田汶水北地汶水出泰山萊蕪縣西入濟

臣謹按汶有五源一出於萊蕪縣之原山水經謂之北汶一出於嶽北仙臺曰羸汶又有出於牟縣者曰牟汶或曰小汶又有柴汶浯汶惟浯汶東流入海餘四汶同會於泰安州徂徠山南曰大汶口又西南入兗州府寧陽縣境至東平州東會坎河諸泉至四汶口而分其西流者入大清河此故道也水經注濟水過壽張縣西界安民亭南汶水從東北來注之是也安民亭今為安平鎮在東平州西南明永樂間於東平州築壩遏汶水至汶上縣東北合白馬河鶯河諸水入南旺湖南北分流於是下流稍移而南而齊魯分境之跡蓋如故也汶北之地故多屬魯而侵於齊公羊盟柯傳莊公將會乎桓莊公升壇曹子手劍而從之管子進曰君何求乎曹子曰城壞壓竟君不圖與願請汶陽之田桓公許諾呂氏春秋齊桓公伐魯魯人不敢輕戰去魯國五十里而封之將盟莊公與曹劌皆懷

劔至於壇上莊公左搏桓公右抽劔以自承曰魯國去境數百里今去境五十里亦無生矣封於汶則可不則請死管仲曰君其許之乃遂封於汶南與之盟由是言之魯之封境固在汶北甚遠齊之侵奪且嘗踰汶而南不特汶陽也僖公賜季友者蓋新反之田當亦無幾也成元年齊敗于鞞迫于晉命而歸魯汶陽田八年晉復使韓穿來言汶陽之田歸之于齊魯終不能有也夷考魯地在汶北者龜山在今新泰縣謹闡及定公所築之蛇淵圉並在今寧陽縣而成三年僑如所圍之棘又在蛇丘北南距汶八十里皆可以謂之汶陽田定十年公會齊侯于夾谷將盟齊人加于載書曰齊師出竟而不以甲車三百乘從我者如此盟孔丘使茲無還揖對曰而不反我汶陽之田吾以共命者亦如之于是齊人來歸鄆謹龜陰田杜注曰三邑皆汶陽田也蓋至是魯始得有汶陽矣然魯地在汶

北猶多成其最著他如龍如桃及平陽萊柞皆齊人所爭而不得者鄆在濟西不可渾入汶陽詳見

三田

費

見上臣謹按尚書大傳周初淮浦徐州並起為寇伯禽伐之于費作費誓史記作吟誓賈逵索隱

皆以費音同秘魯懿公子大夫費伯邑隱七年費伯帥師城郎是也僖公與季友始為季氏邑襄七

年南遺請城費昭十二年南蒯以費叛十三年叔弓帥師圍費定十二年墮費即此漢置費縣屬東

海郡後漢屬泰山郡晉屬瑯琊國宋為瑯琊郡隋屬沂州至今因之城凡四移後漢移薛涇又移祊

城後魏移陽口山隋復還祊城即今治也春秋時故城在今治西南七十里或云費伯食邑在今

魚臺縣西南有費亭晉地道記湖陸西有費亭城非季氏之費也

甯母

傳七年盟于甯母杜注高平方與縣東有泥母亭音如甯臣謹按今魚臺縣東二十里有穀

亭鎮即春秋時之甯母亭也水經注謂之穀庭城泗水經此亦曰穀亭河水深數丈俗名負娘河相

傳有孝子負母渡此

卞

傳十七年夫人姜氏會齊侯于卞杜注今魯國卞縣臣謹按卞古國龍苗生吾融吾融生卞明封

此記曰湯伐有卞春秋時為魯卞邑或曰卞莊子食邑襄二十年季武子取卞史記曹世家頃公亡遷于卞邑漢置卞縣屬魯國晉屬魯郡宋因之後魏省入汶陽縣隋改置泗水縣屬兗州唐宋復因之

升陞

傳二十二年及邾人戰于升陞杜注魯地

昌衍

傳二十七年介葛盧來舍于昌衍杜注魯縣東南有昌平城臣謹按今兗州府東南八十里

有昌平城又城西有

昌平驛亦襲此名

重館

傳三十一年臧文仲如晉宿于重館杜注高平方與縣西北有重鄉城臣謹按重鄉城在今

魚臺縣西

北十一里

郟

文七年城郟杜注卞縣南有郟城郟備邾難也臣謹按郟音魚漢于此置郟鄉縣屬東海郡成

帝封魯頃王之子閔宣帝封楚思王之子光皆為郟鄉侯邑此後漢省今泗水縣東南有郟城

鹹

文十二年叔孫得臣敗狄于鹹杜注魯地後漢志濮陽縣春秋時有鹹城或曰古鹹國

鄆

文十二年季孫行父帥師城諸及鄆公羊作運杜注鄆莒魯所爭者城陽姑幕縣南有員亭員即鄆



也 成十六年傳晉人執季孫行父于莒丘公還  
待于鄆杜注魯西邑東郡廩丘縣東有鄆城臣  
謹按闕駟十三州志曰魯有東西二鄆西鄆在東  
平昭公所居東鄆即莒魯所爭也季孫城鄆時鄆  
屬魯後入于莒成九年楚子重伐莒莒潰楚人入  
鄆襄十二年莒人圍台季孫宿帥師救台遂入鄆  
昭元年季孫宿伐莒取鄆自此鄆又屬魯杜氏楚  
人入鄆注曰鄆莒別邑或者遂疑莒別有鄆然號  
之會莒人以取鄆愬諸侯楚欲執魯使趙孟曰莒  
魯爭鄆為日久矣可證莒鄆即魯鄆也姑幕漢縣  
屬瑯琊郡晉屬城陽國太康十年改屬東莞郡北  
齊又省入東莞故後漢志曰東莞有員亭京相璠  
曰姑幕縣南四十里有員亭在團城東北四十里  
團城者即東莞縣郡亦治焉南燕置鎮名團城以  
其城正員也亦曰員亭劉裕嘗登之以望大峴宋  
泰始三年以張謹為東徐州刺史守團城魏攻取

之亦置東徐州以成固公為刺史戍團城或訛為  
團城聲相近也隋廢郡而改縣曰東安後又改為  
沂水至今仍之有古鄆城在縣治東北四十里古  
姑幕城在諸城西四十里再按成公四年城鄆  
公羊亦作運杜注公欲叛晉故城之以為備此西  
鄆見經之始也昭公孫于齊二十五年齊侯圍鄆  
杜注欲取以居公二十六年齊取鄆公至自齊居  
于鄆二十七年鄆潰定三年齊取鄆以為陽虎邑  
六年季孫仲孫圍鄆杜注鄆貳于齊故帥師圍之  
十年齊人歸鄆田皆此也其地漢屬廩丘縣周于  
此置清澤縣及高平郡隋廢郡改縣曰萬安開皇  
十年置鄆州治此十八年改縣曰鄆城唐貞觀八  
年州移須昌以縣屬焉五代時改屬濟州宋因之  
金大定六年河決徙縣治于盤溝村即今縣治屬  
濟寧州鄆城舊縣在縣東十六里廩丘城在今范  
縣東與鄆城西界相接即杜氏所云也京相璠曰

廩丘縣東八十里有故鄆城

子駒之門

見渠門

勾鯁

戾丘

文十五年公孫敖之二子一人門于勾鯁一人門于戾丘皆死杜注魯邑

泉臺

文十六年毀泉臺杜注臺名公羊曰泉臺者何即郎臺也未成為郎臺既成為泉臺

平陽

宣八年城平陽杜注今泰山有平陽縣臣謹按哀二十七年公及越后庸盟于平陽漢初灌

嬰下下邳擊破楚騎于平陽即此尋置東平陽縣屬泰山郡以河東有平陽縣故加東以別之水經

注洙水自臨樂山逕蓋縣又逕東平陽縣晉泰始中改置新泰縣而東平陽遂廢新泰縣晉改屬東

安郡宋因之魏屬東泰山郡隋屬沂州唐初屬莒州後還本屬宋因之金屬泰安州今仍之舊平陽

城在縣西 樂史云鎮南將軍  
羊祜為平陽人奏立新泰縣

蜀

成二年公會楚公子嬰齊于蜀杜注博縣西北有  
蜀亭 臣謹按齊博邑在今泰安州東北又山東

通志汶上縣西南四十里有蜀山其  
下有蜀山湖與南旺湖東西相對

龍

成二年齊侯伐我北鄙圍龍杜注魯邑在泰山博  
縣西南 臣謹按龍史記作隆劉昭曰博縣有龍

鄉漢高八年封謁者陳署為侯國水經注汶水過  
博縣西北又西南逕龍鄉故城今在泰安州西南

巢丘

圍龍傳南侵及  
巢丘杜注魯地

陽橋

成三年楚侵及陽橋杜注魯地 臣謹按陸澄  
曰博縣有陽橋蓋地名無橋也今在泰安州西

北

棘

成三年叔孫僑如帥師圍棘杜注棘汝陽田之邑在濟北蛇丘縣臣謹按劉昭曰蛇丘縣有棘鄉

蛇丘縣在今寧陽縣西北季氏私考曰棘今當為肥城縣地

中城

成九年城中城杜注在東郡廩丘縣東南臣謹按定六年又城中城廩丘在范縣東南志中

城在廩丘故城西南大全汪氏曰襄十年城西郭西郭者國都外城之郭則兩城中城為國都之內

城三家張也以是觀之不在廩丘矣

壤隤

成十六年公往會晉出于壤隤杜注魯地又昭公之喪送君者自壤隤而反

狸脈

成十七年公孫嬰齊卒於狸脈杜注關或曰魯地在曲阜縣西

鹿圍

成十七年築鹿圍杜注築牆為鹿苑或引後漢志乘氏有鹿城鄉誤

蒲圃

襄四年季孫樹六擯于蒲圃東門之外杜注場圃名襄十六年公會晉六卿于蒲圃定八年陽

虎將享季氏于蒲圃而殺之

邶

襄十年邶人紇扶之以出門者杜注紇邶邑大夫仲尼父叔梁紇也邶邑魯縣東南莖城是也臣

謹按邶論語作鄆注云邶魯邑名正義曰鄆叔梁紇所治邑春秋時大夫每以邑冠于人之上孔叢子孔子將適晉臨河而反還轅息鄆即此晉魯縣屬魯郡即今曲阜縣與今鄆縣相接志云鄆縣西有東鄆村西鄆聚為兩邑接境處蓋即杜氏所謂莖城也寰宇記曰邶城漢為騶縣又曰南平陽縣是直以為鄆國矣大誤

五父之衢

襄十一年季武子將作三軍盟諸偃闕詛于五父之衢林注道名在魯國東南臣

謹按定六年陽虎盟國人于亳社詛于五父之衢  
八年陽虎取寶王大弓以出舍于五父之衢又禮  
記檀弓孔子殯母于五父之衢即此後漢志魯國  
有五父衢地道記云在城東白襃魯記在魯國東

南門外

二里

台

襄十二年莒人伐我東鄙圍台杜注瑯  
琊費縣南有台亭今在費縣東南

劉

襄十五年及宗向戌盟于劉杜注宗地鄭氏曰  
魯地按此因向戌來聘而盟之不應在宗

遇

襄十五年公救成  
至遇杜注魯地

海陘

襄十六年齊師圍成孟孺子  
速塞海陘而還杜注魯隘道

桃

襄十七年齊侯伐我北鄙圍桃公羊作洮杜注卞  
縣東南有桃虛臣謹按晉人來治杞田季孫以

成與之而遷孟氏之邑于桃世  
謂之陶墟又有舜井及媯亭山

陽關

襄十七年齊高厚圍臧紇于防師自陽關逆臧  
孫至于旅松杜注陽關在泰山鉅平縣東旅松

近防地也

臣謹按文二年傳言臧文仲廢六關  
杜注謂塞關陽關之屬定七年齊人歸鄆陽關先

是為齊所取也八年陽虎入謹陽關以叛九年伐  
陽關陽虎使焚萊門師驚犯之而出齊世家威王

六年魯伐我入陽關蓋又為齊所取矣劉昭曰鉅  
平縣有陽關亭括地志陽關故城在博城縣西南

三十九里今在  
寧陽縣東北

旅松

見上

灑水

襄十九年取邾田自灑水杜注取邾田以灑水  
為界也灑水出東海合鄉縣西經魯國至高平



湖陸縣入泗公羊澌移也何休云魯本與邾婁以  
澌為竟澌移入邾婁界魯隨而有之正義以為不  
可通臣謹按哀二年季孫斯伐邾取澌東田及  
沂西田即此水經注澌水出合鄉縣其水西南流  
入邾經魯國鄒山東南又西南逕蕃縣故城南又  
西逕薛縣故城北又西逕仲虺城北又西逕湖陸  
縣入泗即杜氏所云也合鄉漢縣屬東海郡晉因  
之宋屬蘭陵郡後魏因之北齊省今嶧縣西北有  
合鄉故城沛縣志即論語所謂互鄉也湖陸即湖  
陵在今魚臺縣東北晉時澌道也今滕縣有郭陽  
里澌上村又南十五里有澌河源于縣東北百里  
之迷山循崆峒山會黃約山諸泉水又南過鳳皇  
山納龜步水又南至華蓋山受石溝水又南過滄  
浪淵納明河水又南至黃甫壩又北趨趙溝會南  
梁水入漕河源流與古稍異蓋上不復出合鄉下  
不復入泗水也先時出鄒山東則流于邾魯之間

正義邦在潞南田在潞北此魯取邦田之境也齊乘云有沙河水出自鄒嶧山西南流合于潞或又

辨其不然俟考

### 西郭

襄十九年城西郭杜注魯西郭左傳懼齊也

### 武城

襄十九年城武城杜注泰山南武城縣臣謹按左傳昭二十三年邾人城翼還自離姑武城

人塞其前邾師過之遂取之哀八年吳伐我子洩率故道險入武城子洩本魯人杜預曰故由險道欲魯成備是也初武城入或有因于吳竟田焉拘邾人之漚管者曰何故使我水滋及吳師至拘者道之以伐武城克之論語子游為武城宰又云子之武城孟子曾子居武城有越寇皆此後亦謂之南城齊威王謂魏惠王吾臣有檀子者使守南城楚人不敢為寇是也漢置南城縣屬東海郡亦曰

南城武帝封城陽共王子自為南城侯後漢改屬泰山郡晉因之咸寧中以羊祜為南城人置南城郡封祜祜不受尋曰南武城縣劉宋復為南城縣後魏因之屬東泰山郡後齊省入顯史縣通典費縣有古武城今故城在費縣西南九十里

泗上

襄十九年諸侯次于泗上疆我田杜注正邾魯之界也泗水名臣謹按此魯城北之泗也哀八年吳伐魯深入魯地舍于庚宗次于泗上十一年師及齊師戰于郊右師奔齊人從之陳謹陳莊涉泗國語宣公夏濫于泗淵里革斷其罟而棄之志以為皆此泗也從征記洙泗二水交于魯城東北十七里今在曲阜縣西北八里自泗水縣流入境入嶽陽縣界

鹿門

見渠門

高魚

襄二十六年齊烏餘以廩丘奔晉遂襲我高魚  
杜注廩丘東北有高魚城 臣謹按漢志廩丘

縣東北有高魚城後謫為高梧唐乾寧二年朱全  
忠遣朱友恭圍朱瑾于兗州朱瑄自鄆州馳救友  
恭設伏敗之于高梧胡氏曰即高魚也俗又訛為  
交魚今其地在鄆城東北廩丘在濮州范縣見齊

地蓋縣北與  
范縣接界

陽州

襄三十一年齊閭丘嬰伐陽州杜注魯地 臣  
謹按昭二十五年公孫于齊次于陽州杜注齊

魯境上邑定八年公侵齊門于陽州苦越生子陽  
州之役獲之名曰陽州蓋陽州當為齊有近志在  
東平州  
西北

庚宗

昭四年初穆子去叔孫氏及庚宗杜注魯地  
臣謹按時穆子適齊又哀八年吳伐我舍于庚

宗次于泗上當在魯北竟此時吳師自  
武陵而來也今泗水縣東有庚宗亭

丘猶

疾叔孫田于丘猶遇  
杜注丘猶地名

蚡泉

昭五年叔弓帥師敗莒師于蚡泉杜  
注魯地公羊作瀆泉穀梁作賁泉

大庫之庭

昭五年豎牛作亂攻諸大庫之庭杜注魯  
城內有大庭氏之虛于其上作庫臣謹

按昭十八年宋衛陳鄭火梓慎登大庭氏之庫以  
望之杜注大庭氏古國名魯于其處作庫高顯故

登以望氣據此則二地本一矣其曰大庫之庭蓋  
傳寫之訛也大庭氏子華子以為在伏羲前世紀

以為在伏羲後譙周曰曲阜城東有大庭坡炎  
帝所居今曲阜東有坡高二丈又有大庭庫

塞關

豎牛奔齊蓋仲之子殺諸塞關之外  
杜註齊魯界上關亦六關之一也

萊柞

昭七年季孫以桃易孟氏之成其臣謝息辭以無山與之萊柞臣謹按漢置萊蕪縣屬泰山

郡應劭曰魯之萊柞邑蓋邑有二小山也晉宋因之後魏移嬴縣置此唐并入博城于其地仍置萊

蕪縣今如故

屬泰安州

紅

昭八年秋蒐于紅杜注魯地沛國蕭縣西有紅亭遠疑臣謹按後漢志劉昭注沛國虹縣有紅亭

水經注亦載之然杜氏固以遠為疑劉昭又云泰山奉高縣有紅亭在縣西北即大蒐于紅處較為

稍近又左傳云自根牟至于商衛革車千乘杜注根牟魯東瑯琊陽都縣有牟鄉商宋地魯西竟接

宋衛也此蓋全舉魯國之幅員以見蒐為大蒐所謂問國君之富數馬以對也劉昭遂謂紅地接宋

衛大謬牟城在今沂水縣東南見根牟國

郎園

見郎

比蒲

昭十一年大蒐于比蒲杜注無又定十三年大蒐于比蒲定十四年大蒐于比蒲

禋祥

昭十一年仲孫纘會邾子盟於禋祥杜注闕或曰在兗州府滋陽縣境

泉丘

清丘之社 昭十一年泉丘人有女奔孟僖子其僚從之盟于清丘之社杜注泉

丘魯地

昌間

昭二十二年大蒐于昌間公羊作姦啖氏曰昌間魯地

沂上

昭二十五年季孫請待于沂上以察罪杜注魯城南自有沂水臣謹按今曲阜縣南二里雲

門沂水出自尼山西流經此論語所云浴乎沂風乎舞雩者也又西入滋陽縣境合于泗水舞雩壇

亦在縣南。衛宏漢舊儀魯雩壇在城東南引龜山水為池。至壇西曰雩水。尼山在縣東南五十里。杜注云魯城南自有沂水。蓋以別于沂州之沂水也。此沂水出蓋縣臨樂山入于沫。乃哀二年所謂取沂西田者。

郈

昭二十五年臧會奔郈。杜注郈在東平無鹽縣東。南臣謹按郈叔孫氏邑也。定十年侯犯以郈叛。

叔孫州仇帥師圍郈。十二年仲由為季氏宰將墮三都。叔孫氏墮郈。即此也。漢無鹽縣屬東平國。晉因之。在今東平州東二十里。漢志無鹽縣有郈鄉。括地志郈城在東平州宿城縣東三十二里。今在

東平州東南四十里

桐汝

臧氏使五人杖諸桐汝之間。杜注里名。



淄

昭二十六年成人伐齊師之飲馬于淄者杜注淄水出泰山梁父縣西北入汶臣謹按寧陽縣東

北舊有淄水今涸漢梁父縣屬泰山郡晉因之唐廢其地在今泗水縣北四十里水經注城北即梁

父山舊志云故城去泰安州六十里

炊鼻

師及齊師戰于炊鼻杜注魯地

雉門兩觀

定二年雉門兩觀災杜注雉門公宮之南門兩觀闕也臣謹按是年冬十月新作

雉門及兩觀孔子為魯司寇誅少正卯于兩觀之下即此又雉門之左有亳社右有周社成季之繇

日間于兩社為公室輔兩社之間朝廷議政事之所也

拔

定三年仲孫何忌及邾子盟於拔杜注闕臣謹按左傳盟於郟脩舊好也杜注郟即拔也或曰在

兗州府  
磁陽境

東野

定五年季平子行東野杜注季氏邑還卒于房既葬桓子行東野及費莊子有東野稷今闕

里志周公後有東野氏蓋以邑為氏東野及房蓋皆近費之邑

房

上見

上東門

見渠門

棘下

定八年公斂處父與陽虎戰于棘下杜注城內地名

龜陰田

定十年齊人來歸鄆謹龜陰田杜注泰山博縣北有龜山陰田在其北也臣謹按詩云

奄有龜蒙即此龜山也又夫子去魯作龜山之操今在新泰縣西南四十里杜云在博野之北蓋地

相接也。峰巒層疊為魯境之望。謝城孔氏曰：齊人歸鄆，謹龜陰之田，皆在汶北。魯築此城以旌孔子名，曰謝城。河渠志曰：謝過城有泉流入汶河，城蓋與泰安州相接。

武子之臺

定十二年，費人襲魯，公與三子入季氏之宮，登武子之臺。今曲阜縣東有臺，相去

二百五十步，高三丈五尺，即武子之臺。又有襄仲臺，周迴四十步，高五丈，去縣東三里，俱在建春門

內

姑蔑

見蔑

蛇淵園

定十三年，築蛇淵園。臣謹按：水經注：蛇水出蛇丘，東北泰山西南，南流逕汶陽之田，又西

南，逕鑄城西，即傳所謂蛇淵園也。又西南，逕下謹城，又西南，入汶。漢置蛇丘縣，屬泰山郡。蛇讀移後

漢及晉俱屬濟北國劉宗因之後魏屬東濟北郡北齊廢

莒父

霄

定十四年城莒父及霄杜注公叛晉助范氏故懼而城二邑 吳氏曰莒係以父魯

人語音如梁父亢父剛父單父猶吳之有胥邦之有婁子夏為莒父宰即此

漆

定十五年冬城漆杜注邾庶其邑 臣謹按襄二十一年邾庶其以漆閭丘來奔杜注南平陽縣東

北有漆鄉茲蓋城之以處庶其也南平陽在鄒縣北漆鄉亦當在鄒縣北

啟陽

哀二年季孫叔孫城啟陽公羊作開陽杜注今瑯琊開陽縣 臣謹按水經注開陽在枋之東

南沂水經其南故邾國也昭十八年邾人入邾後屬魯荀子說齊相楚人則有襄賈開陽以臨我左

是矣漢置啟陽縣屬東海郡後以景帝諱改開陽元和中瑯琊王京都莒請徙官開陽以華蓋南武

陽厚丘 贛榆五縣 易東海之開陽臨沂許之遂為  
瑯琊國 治晉因之 劉宋移郡治即丘縣 并入焉 故  
城在沂州北十五里 漢官儀洛陽城東南第一門  
始成夜有一柱止樓上 開陽縣上言南門一柱飛  
去 即洛城門也 按荀卿已作開  
陽 則景帝改名亦因其舊耳

毗

哀五年 城毗公 羊作庇 又作比 竹書記年  
殷祖乙居庇 南庚更自庇遷奄 奄魯奄也

邾

邾瑕 哀六年 城邾瑕 杜注任城亢父縣北有邾婁城  
劉昭曰 即邾瑕也 今在濟寧州南二十里

負瑕

哀七年 公伐邾 以邾子益來 囚諸負瑕 杜注魯  
邑 南平陽縣西北有瑕丘城 臣謹按 負瑕 杜注漢

置瑕丘縣 屬山陽郡 武帝封魯恭王 政為侯 邑晉  
省 入南平陽縣 屬高平國 宋元嘉末 置兗州 治瑕  
丘 故城 隋開皇三年 復置瑕丘縣 仍為兗州 治唐  
因之 宋大觀四年 避宣聖諱 改為瑕縣 尋又改為

崑陽因山為名明初省洪武十八年改築府城始移縣于今治瑕丘古城在府西二十五里今城北

六里有負瑕泉南流入泗

闡

哀八年齊人取謹及闡公羊作僮杜注闡在東平剛縣北臣謹按應劭曰剛城故闡邑也戰國時

為齊之剛邑秦昭王三十六年取齊剛壽即此漢置剛縣屬泰山郡後漢屬濟北國晉曰剛平屬東平國後省水經注汶水西南逕剛縣北是也後訛岡為堙今有堙城壩京相璠曰闡亭在剛縣北四十里寰宇記剛縣故城在寧陽縣今寧陽縣東北三十五里有故剛城

東陽

哀八年吳伐我克東陽而進舍于五梧明日舍於蠶室杜注三邑魯地臣謹按呂氏春秋夏

孔甲遊于東陽田于萑山即此劉昭曰南城縣有東陽城今為關陽鎮置關陽川巡司于此地在費

縣西南

七十里

五梧

見上 在費縣西哀二十五年公至自越季康子孟武伯逆于五梧公宴于五梧即此

蠶室

見上 今滕縣東三十里有蠶母山

萊門

見渠門

黨氏溝

哀十一年季孫使冉求俟于黨氏之溝杜注朝中地名

稷曲

哀十一年齊國書伐我齊師自稷曲杜注郊地名

大野

哀十四年西狩于大野獲麟杜注大野在高平鉅野縣東北大澤是也臣謹按禹貢大野既

瀦職方十藪魯有鉅野即此也澤東西百里南北三百里秦末昌邑人彭越漁于鉅野澤中為羣盜

漢元光中河決瓠子東南注于鉅野晉太和四年桓溫伐燕至金鄉遣毛虎生鑿鉅野三百里引汶水合清河引舟入河義熙十四年劉裕伐秦遣王仲德開鉅野入河建據滑臺隋後濟流枯竭鉅野漸微元末河徙涸為平陸漢置鉅野縣于澤西五里晉屬高平國金皇統中析置嘉祥縣于山口鎮相傳即獲麟處也其地有獲麟堆括地志云在鉅野縣東十二里宗國都城記鉅野故城東十里澤中有三臺廣輪四十五步俗謂之獲麟堆鉅野縣唐時嘗置麟州屢廢復置嘉祥縣屢徙獲麟堆古城在今治西

二十五里

丘輿

哀十四年司馬牛卒于魯郭門之外葬諸丘輿杜注泰山南城縣西北有輿城

春秋地名攷畧卷二